

宋史新編

卷一百九十五
之一百九十七



宋史新編卷一百九十五

列傳一百三十七

明南京戶部主事莆田柯維騏編

金國二

撒改烏古之孫劾者長子也盈歌襲位念兄劾者最長
不得立因命撒改爲國相能馴服諸部獄訟悉得其情
時有言不見相國事何從決烏雅束襲位撒改與阿骨
打分治諸部阿骨打襲位屢敗遼兵撒改同諸將勸進
旣稱帝撒改行國相如故伐遼之計雖決於迪古乃銀
朮可實自撒改啓之進拜國論胡魯勃極烈卒後改贈
金源郡王配享阿骨打之廟謚忠毅迪古乃又名忠完

顏部人既與阿骨打言遼可取狀卽以兵會伐屢敗遼
兵克東京及顯州降乾懿等州命爲耶懶路都勃堇天
眷中累加保大軍節度使同中書門下平章事其卒也
追贈配享竝與撒改同

宗雄本名謀良虎烏雅束長子也幼善射及長辨智孝
謹人愛敬之阿骨打屢伐遼宗雄皆身先士卒摧鋒逐
北一時罕有比者既取秦州宗雄包其土來奏曰其土
如此可種植也由是徙萬餘家屯田境中西京既降復
叛衆議欲罷攻宗雄曰西京都會也若委而去則降者
離心遼之餘黨與夏人得以窺伺矣乃立重賞激士心

竟克之仍與宗翰等大破耿守忠救兵七千于西京之
東未幾卒封楚王謚威敏與配享

阿鹵合邁烏古第八子也健捷善戰贊阿骨打伐遼屢
有功同宗翰等勸進曰大功已集宜有以繫天下心既
卽位與宗翰同獻耕具九祝曰願母忘稼穡之艱難阿
骨打以爲國論乙室勃極烈性聰敏凡一聞見終身不
忘始未有文字祖宗族屬時事竝能默記預脩譜牒阿
骨打幸其家問疾并及國事對曰馬者甲兵之用國俗
以良馬徇葬可禁止之比亟猶有遺奏後改封隋國公
與配享謚剛憲

習不失本名辭不失石魯之孫健捷能左右射自効里鉢時已立戰功阿骨打出河店之戰惟習不失謀合卒破十萬之師拜爲阿買勃極烈其後阿骨打每伐遼輒命習不失與吳乞買居守倚任與撒改侔習不失父烏骨出酗酒屢悖其母母殺之人謂習不失克蓋前人之愆云卒後封金源郡王與配享謚忠毅子鶻沙虎亦名將

幹魯宗室子也同諸將攻拔幹豁城又城高麗收國中爲統軍與閣母蒲察幹魯古等伐高末昌城降末昌被執殺之於是遼南路係籍女真及東京州縣盡降命幹

魯爲南路都統迭勃極烈燭隈水部叛幹魯殺其首惡四人撫定餘衆遼西京破遼主奔陰山幹魯爲西南路都統往襲之遼主奔應州宗翰爲西北西南兩路都統也幹魯及蒲家奴副之幹魯兩奏疆場事宜其云勿割山西與宋與宗翰議同也宗翰等人宋幹魯行兩路都統事天會中卒後封鄭國王與配享幹魯古亦宗室子累功至咸州路都統其攻拔顯州降乾懿諸州功與幹魯等以罪降爲謀克卒後贈特進同配享謚莊翼宗翰本名粘沒喝漢語爲粘罕撒改長子也自少健勇伐遼計議多與阿骨打合率群臣勸進授移賚勃極烈

既克臨潢宗翰請乘時進取中京乃副斜也等統師克之遼護衛習泥烈被獲知遼主獵鴛鴦灤可襲而取兩使人報斜也斜也意未決宗幹力贊宜如宗翰請斜也因定約分軍追遼主遼主奔西京宗翰復追至白水灤獲其寶貨西京降遣希尹等追遼主于乙室部遼主奔陰山西京叛宗翰復取之悉撫定西路州縣部族又與宗望等從阿骨打取燕京吳乞買立宗翰屢沮割山西地與宋宗望亦以爲言已復竝請南伐於是以斜也領都元帥居京師宗翰爲左副元帥自太原路進師宗望爲南京路都統自燕山路進師宗望克燕山至汴許宋

和解圍無何復攻汴宗翰亦克太原趨汴汴京破執二帝北歸語在欽宗本紀中宗翰賜鐵券高宗立復委宗翰等伐宋宗翰會宗輔自濮進師連克郡縣遣拔离速等襲高宗于揚州高宗渡江南遁奉書自貶大號稱宋康王趙構請存趙氏社稷不許分遣撻懶宗弼等南追至海不及而還語在高宗本紀中宗翰朝京師與宗輔宗幹希尹合議建儲以先帝嫡孫合刺再三請合刺立宗翰自國論右勃極烈都元帥拜太保尚書令領三省事封晉國王卒贈秦王謚桓忠與配享子孫三十餘人悉遭海陵之禍

宗望本名幹魯補又作幹离不阿骨打次子也歷都統副元帥善用兵其擒遼主妻子得傳國璽殺張覺父子撫定南京降郭藥師董才獲其用伐宋夜破姚平仲襲營兵四十萬克汴執徽欽二帝北歸皆雋功也餘見宗翰傳中克汴未幾卒後贈太師與配享改封宋王謚桓

蕭

婁室字幹里衍完顏部人佐阿骨打累敗遼兵降諸部落既克黃龍府命婁室爲萬戶守之進都統從斜也取中京追遼主同閣母攻破西京獲阿疎夏人救遼金兵兩爲所敗婁室與諸將合擊大破之遼都統大石犯奉

聖州婁室擒大石其衆遂降夏人屯兵可墩館婁室破朔州西山兵二萬擒其帥趙公直遼主奔余都谷婁室襲而獲之賜鐵券惟死罪乃答諸將侵宋婁室屢破宋兵其後婁室專事陝西連克州郡叛者討平之殘破蕩析者置官府安輯之宗輔總戎陝西也婁室已有疾富平之戰宗弼左翼軍已却婁室力疾以右翼鏖戰張浚軍遂潰宗輔推服謂古名將無以加也卒贈開府儀同三司追封莘王以正隆例改贈金源郡王與配享謚莊毅子活女謀衍石古乃皆顯有戰功

銀朮可宗室子也初與習古迺如遼取阿疎還言遼可

取狀阿骨打意遂決阿骨打與遼將戰于達魯古城遼兵二十萬銀朮可與婁室率衆衝其中堅凡九陷陣輒戰而出遼兵大敗旣爲謀克與婁室戍邊又同攻黃龍府敗遼兵萬餘于白馬濼斜也克中京婁室獲遼主宗翰定太原克汴京銀朮可皆與有功與希尹同賜鐵券天會十年爲燕京留守數年致仕加保大軍節度使同中書門下平章事遷中書令封蜀王卒後贈金源郡王與配享大定中謚武襄其二弟曰麻吉曰拔离速皆爲名將云銀朮可有妹沙里質嫁阿隣天輔六年黃龍叛卒鈔略部族時阿隣從軍沙里質糾集居民纔得男女

五百人樹營柵保守賊千餘來攻沙里質杖劍督戰凡三日賊乃退以功封金源郡夫人

闍母阿骨打之異母弟也代幹魯古爲咸州副都統紗也克中京宗翰克西京婁室略定天德等州獲阿疎闍母有力焉興平中闍母爲南路都統嘗爲張覺所敗吳乞買使宗望問敗軍狀宗望遂以闍母軍討覺覺敗乃赦闍母罪旣而闍母克南京撫定兵民吳乞買詔褒之闍母奏宋敗盟有狀遂爲都統同諸將南伐降燕山克汴州師還下河間連有莫州濰州之捷及議伐高宗闍母欲先定河北吳乞買酌群議竝興師闍母年四十卒

後與配享封魯王謚莊襄阿疎者自頗刺淑時爲勃董
盈歌嗣立阿疎叛歸遼語在遼洪基傳阿骨打伐遼每
以阿疎爲辭及被獲軍士問爾爲誰曰我破遼鬼也
斜也又名杲阿骨打母弟也初爲昚勃極烈取春州泰
州繼爲忽魯勃極烈都統內外諸軍取中京復取西京
時山西諸城雖降而人心未固斜也使宗望請金主臨
軍遂定燕京吳乞買立斜也爲諳班勃極烈與宗幹並
治國政未幾卒與配享謚知烈斜也同時諸將又有蒲
家奴撒离喝習失皆有勲勞烏祿圖畫勲臣于衍慶宮
自斜也至習失凡二十一人撒离喝歷事海陵至行臺

左丞相兼左副元帥爲所忌誣以謀叛族誅大定追封
金源郡王與配享謚莊襄斜也子孫亦爲海陵殺百餘
人

宗幹本名幹阿骨打庶長子也佐阿骨打伐遼進退皆
中機會吳乞買立爲國論勃極烈天會三年獲遼主始
改女真舊章用漢制度正官名定服色興庠序設選舉
治曆明時皆自宗幹啓之合刺立與宗翰並領三省事
進至太師封梁宋國王卒亮其子也旣篡立加宗幹帝
謚并廟號烏祿立乃削奪封皇伯太師遼王謚忠烈明
昌升配享

宋史新編卷之三十五
宗弼本名兀朮又作幹噉亦作幹出或作晃幹出阿骨
打第四子而宗望之弟也從宗望宗輔先後伐宋蹙高
宗于溫州又從宗輔定陝西克和尚原天眷中進都元
帥時置行臺於燕京詔宗弼為太子兼領行臺尚書省
事蓋總軍旅與民訟錢穀也其誅撻懶恢復陝西河南
地與宋定畫淮之約語在宋本紀賜金券進至太師職
任如舊卒謚忠烈與配享烏祿嘗稱宗翰之後惟宗弼
一人云子孛迭歷東西京留守為海陵所忌殺之大定
追封韓王

希尹原名谷神完顏部人曾祖佐金三世祖服諸部土
人以其名同故呼曰賢石魯以金祖為勇石魯云賢石
魯生劾孫舉部來歸劾孫生歡都事四主勤勞四十年
贈開府儀同三司謚忠敏歡都生謀演希尹謀演以功
贈太傅希尹自阿骨打舉兵常任行陣屢有功天會大
舉伐宋為元帥右監軍再伐宋執二帝以歸賜鐵券合
刺即位希尹為丞相坐讒奔其子誅之後知其非罪贈
儀同三司邢國公為改葬大定中謚貞憲希尹嘗製女
真字謂之大字合刺又製女真字謂之小字俱行用孫
守道事烏祿以忠勤被眷有諫無不從至左丞相謚簡
靖蓋重其能全始終云

先史新編卷之三十五
勛字勉道本名烏野盈歌第五子也宗翰等入宋金主
吳乞買使勛就軍中往勞之宗翰等問所欲曰惟好書
耳載數車而還女真初無文字及破遼獲契丹漢人始
通契丹漢字而完顏希尹依倣契丹字製女真字於是
始有記錄吳乞買復進士舉而韓昉輩皆在朝文學之
士稍擢用天會六年命勛與耶律迪越掌國史採撫祖
宗遺事皆得其實歷事合刺累遷左丞相拜太師進封
漢王合刺嘗與近臣連日酣飲或徹夜勛疏諫乃爲止
酒亮方用事朝臣多附之者一日大臣會議亮後至勛
面責之其剛正類此亮篡立誅宗本等勛鬚鬢頓白因

力請致仕進封周宋國王後例降金源郡王卒大定末
表章其諫疏詩文及所獻射虎賦子宗秀封廣平郡王
程案者字公弼析津人遼第進士燕旣入金案歷事合
刺爲諫議大夫累疏請脩禮樂乃命有司議贈上阿骨
打尊諡至彰德軍節度使卒案剛直耿介不諂奉權貴
以希苟進有古君子之風云

韓企先燕京人其先累世仕遼皆貴顯乾統間企先第
進士回翔不振金克遼累擢西京留守天會六年代劉
彥宗爲同中書門下平章事知樞密院事十二年爲尚
書右丞相時方議禮制度禮部尚書韓昉多有因革企

先博通經史咸與折衷務爲官擇人推轂善類一時臺省多君子至於關決大政與大臣謀議不使外人知之世稱賢相皇統六年封漢王卒正隆例降封齊國公大定配享吳乞買之廟後謚簡懿劉彥宗在遼登進士乙科至簽書樞密院事同左企弓等降金佐諸將經略專理州縣之事務農積穀供億賴之非武功預衍慶宮圖像者惟彥宗與企先耳韓昉亦燕京人遼天慶二年進士第一仕金爲禮部最久兼翰林學士太常卿歷參知政事雖貴猶好學不輟善屬文金朝大製作皆出其手外國亦敬慕之皇統六年以儀同三司致仕

宗賢本名賽里習不失之孫也累功至左丞相兼都元帥合刺之后其母黨也后專政未嘗附以進用合刺二子死請選後宮以廣繼嗣曾不顧忌於后海陵同在相位不肯稍假借海陵因與后力排出之宗賢不以是少變合刺納常勝妻於宮中將立爲后未果爲海陵所弑海陵欲并殺諸王大臣詭合刺命以立后召之宗賢謂人曰若立常勝妻吾當以死爭及被殺猶不知其爲海陵也

蕭仲恭祖仕遼爲司徒父爲司空尚主仲恭性恭謹有禮節遼主天祚西奔天德仲恭爲護衛太保兼領軍事

一日金兵奄至仲恭從遼主西走時雪寒乏食仲恭進衣并乾糲遼主困仲恭伏冰雪中遼主藉之以憩凡六日乃至天德始得食後與遼主俱見獲吳乞買以仲恭忠於其主特加禮待擢都點檢宗磐與宗幹爭辨金主合刺之前宗磐拔刀向宗幹仲恭呵之乃止累遷平章政事封濟王天祚死葬廣寧仲恭請往會葬合刺義而許之進尚書右丞相拜太傅領三省事天德封越國王除燕京留守卒謚貞簡正隆例改儀同三司鄭國公張通古字樂之易州人遼天慶二年第進士補樞密院令史丁父憂起復懇辭不獲因遜去屏居興平阿肯打

定燕京割以與宋宋以通古人望召之通古辭謝隱於太寧山下金復取燕通古以薦得進用歷四主至平章政事拜司徒致仕進封曹王通古官宰相自奉如寒素鞠胙王獄不肯阿附張浩張暉坐與磁州僧法寶款昵失大臣體海陵各杖二十獨稱通古三教該通足爲儀表云

胡礪字元化武安人天會十年舉進士第一歷翰林脩撰禮部郎中一時典禮多所裁正礪性剛直位尊已者事之以正不少阿或有陵蔑下寮者以禮折之海陵拜平章政事百官賀於廟堂礪獨不跪海陵問故礪以令

對且曰朝服而跪見君父禮也終翰林學士改刑部尚書

烏林答贊謨自收國以來與禱益溫敦思忠皆司閹刺之任閹刺者漢語云行人也贊謨歷行臺參知政事時思忠爲行臺尚書左丞贖貨無厭贊謨鄙之兩人由是交惡海陵殺左丞相秉德于行臺贊謨妻秉德乳母也思忠因構殺之遂納贊謨妻曹氏盡取其財產烏祿稱贊謨忠實剛毅贈特進璟追還財產賜葬地思忠歷尚書令位丞相上海陵欲定封爵制度風思忠建白封王者皆降封惟封思忠廣平郡王後以諫伐宋頗見疎

高楨渤海人少好學業進士金將破永昌以楨同知東京留守事海陵擢至司空兼太子太保行御史大夫進封代王正隆例改冀國公海陵嘗幸中京楨爲留守警夜嚴肅有倖臣夜飲于禁杖之瀕死在臺久彈劾無所避每進對必以區別流品進善退惡爲言遂招憎怨幾陷中傷疾革曰某事未決某事未奏死有餘恨平生家居無聲伎之奉雖暑甚未嘗解衣緩帶對妻孥危坐終日其方嚴簡靜如此

祁宰字彥輔江淮人在宋爲醫官金入汴得之累遷中奉大夫太醫使數被賞賚常感激欲自效海陵將伐宋

上疏諫大略謂今謀臣猛將不如祖宗時而宋人無罪
兵出無名加以賦役煩重民人怨嗟此人事之不脩也
况且天時不順地利不便言甚激切海陵怒命戮於市
籍其家產大定明昌間贈資政大夫復田宅錄用其子
泰和初詔定功臣謚不及宰尚書省掾李秉鈞上言海
陵之大臣皆畏罪典忍曾不敢伸一喙畫一策爲社稷
計卒使立名死節之士顧出於醫卜之流亦可愧矣乞
賜謚以旌其中得謚忠毅按秉鈞所斥大臣乃右丞相
張浩尚書左丞耶律安禮也安禮系出遙輦氏篤孝謹
廉斯可稱者浩渤海人天會賜進士及第無事不爲無

役不從大定復用爲相至尚書令謚文康

蕭永祺字景純本名蒲烈通契丹大小字廣寧尹耶律
固作遼史未成永祺出其門繼成之作紀志傳共七十
五卷累官翰林學士遷承旨海陵欲以爲尚書左丞永
祺曰臣材識卑下不足以辱執政海陵曰今天下無事
朕方以文治卿爲是優矣永祺固辭謂人曰執政係天
下休戚貪冒寵榮如蒼生何海陵嘗選近臣備咨訪獨
永祺論議寬厚時推爲長者

宗敘本名德壽闍母子也歷事烏祿爲寧昌軍節度使
契丹擁衆猝至城中兵少宗敘自將擊之不敵被執父

而脫歸拜兵部尚書同諸將伐契丹禦宋兵皆屢捷宋和議成除河南路統軍使河決李固渡分流曹單之間詔遣都水監梁肅相度宗敘言河道填淤不受水故決溢今欲河復故道卒難成功幸而可塞他日亦不保沿河數州驟興大役人心動搖恐宋人乘間構爲邊患梁肅亦請聽兩河分流以殺水勢遂止不塞拜參知政事出巡邊道卒遺表朝政得失及邊防利害烏祿深悼念其勤勞國家云後與配享

宗憲本名阿懶撒改次子也少入太學兼通女真契丹漢字未冠從宗翰入宋破汴京衆爭趨府庫取財賄宗

憲獨載圖書以歸金初制度多沿舊宗憲謂宜遠引前古何乃近取遼人合刺時尤多匡諫時議以齊地與宋宗憲廷爭析之後卒用其策大定中拜太子太師平章事高山奴昔以罪廢烏祿以功臣裔召之宗憲曰傲狠貪墨之人不可置之左右烏祿遂追還制命顧近臣曰此朕之過舉不可不改卿等當盡心以輔朕宗憲進拜右丞相卒

李石字子堅遼陽人歷興中尹石知海陵忌宗室而海陵又知石爲烏祿母舅石頗不自安秩滿託疾還鄉里烏祿留守東京而副留守高存福承海陵旨圖烏祿石

勸烏祿先除存福而後舉事既卽位請亟趨中都據腹
心以號令天下萬世之業也烏祿卽日啓行石拜參知
政事女納後宮是爲元妃歷太尉尚書令以太保致仕
進封廣平郡王卒謚襄簡石嘗兼御史大夫糾劾不避
樞要獨中年以冒粟見斥論者鄙之以大定定策功與
配享同時有獨言義者爲利涉軍節度使聞烏祿立卽
日來歸以爲參知政事烏祿問義曰若正隆返旆北指
計將安出義曰正隆多行無道必自斃且將士在南家
屬皆在北惟早幸中都爲便卒如所料云

蒲察鼎壽本名和尚上京曷速河人海陵女弟所生之
子尚金主合刺女璟之后父也鼎壽性沈厚有明鑒通
契丹漢字長於吏事歷駙馬都尉蠡州刺史濬州防禦
使有惠政兩州人刻石紀之又歷兩鎮節度使左右宣
徽使河間尹有宗室居河間侵削居民鼎壽奏徙其族
于平州郡內大治卒贈太尉越國公鼎壽長子辭不失
凡三尚主蓋金制娶后嫁女不出蒲察徒單六七貴族
若鼎壽則尤寵遇者也然未嘗以富貴驕人當時以爲
外戚之冠云

紇石烈志寧上京胡塔安人海陵時副白彥敬爲都統
討契丹撒八兩人聞烏祿有異志陰結節度使獨吉義

宋史新編卷之九十五
等圖烏祿而烏祿已立獨吉義即日歸附惟彥敬志寧
不受烏祿招殺其使者九人既被伐力屈乃俱降烏祿
不之罪會契丹餘孽窩斡稱帝元帥完顏謀衍完顏福
壽竝恃功怠事烏祿命僕散忠義代謀衍志寧代福壽
窩斡平志寧爲副元帥經略宋事而忠義以丞相總戎
居汴志寧與忠義協謀大破李世輔兵復同渡淮追宋
宋孝宗遂定和議罷兵其敗宋兵及駁宋書辭語在烏
祿傳忠義被命還京師志寧加平章政事駐汴蓋藉以
規撫南服久之還京師拜樞密使以子諸神奴尚金主
女大定九年拜右丞相志寧辭曰受詔征伐則不敢辭

爲宰相則誠不能累封金源郡王卒與配享

僕散忠義上京拔盧古河人阿骨打外家姻也嘗爲博
州防禦使公餘學女真字及古算法閱月盡能通之在
郡罷田獵燕遊以職業爲務境內翕然稱治其總戎平
窩斡與宋定和議功與紇石烈志寧等召拜左丞相大
定六年卒忠義動由禮法樂稱儒者善御將能得其死
力及爲宰輔知無不言自古恩威鮮有兼任將相功名
始終如忠義者謚武莊後又勒銘墓碑與配享圖像衍
慶宮子揆尚金主女歷事璟至平章政事北征南伐累
建大功詔以其子安貞尚女卒謚武肅徒單合喜者上

京速蘇海水人善料敵應變功著秦隴至平章政事封定國公同忠義配享云

紇石烈良弼本名婁室回怕川人自幼能習希尹文字年十四爲北京教授天德中歷刑部尚書賜之名海陵稱其不阿諂累遷尚書左丞烏祿卽位盡黜海陵時懷祿偷安之臣以良弼嘗諫伐宋乃復用之遷至左丞相致仕卒追封金源郡王謚誠敏勒銘墓碑與配享良弼忠正敏辨善斷決爲宰相朝夕惕惕謀慮深遠舉人材常若不及居位二十年贊太平之功號賢相云唐括安禮者字子敬海陵時爲翰林學士改節度使烏祿遷至

右丞相稱其正直練達與左丞相習顯無異卒與配享又有移刺道者篤孝通女真契丹漢字且清廉有幹局海陵謂有公輔器大定中歷翰林直學士遷至平章政事

石琚字子美定州人父臯爲郡吏廉潔多陰德琚博涉經史工文詞天眷二年進士第一歷吏部郎中侍郎尚書典選且十年凡宋齊換授官格南北通注銓法能縷指而次第之號爲詳明拜參知政事進左丞兼太子少師烏祿將行郊祀議配享琚曰配者侑神作主也漢魏晉皆以一帝配唐宋之初增及二宗終竟以一祖配宜

宋史新編卷之五
依古禮從之後由平章政事拜左丞相致仕卒烏祿留
意政治琚裨贊爲多烏祿末年將立元妃爲后以問琚
答曰元妃自有子元妃立東宮搖矣烏祿悟而止論者
謂許敬宗一言幾亡唐祚琚之對爲金謀至矣謚文憲
後圖像行慶宮與配享

孟浩字浩然灤州人遼末第進士入金歷事合刺爲郎
宰相韓企先拔擢一時賢能置機要以田穀爲吏部侍
郎以浩爲左司員外郎既典選善銓量鑒別引用悉君
子而小人蔡松年曹望之許霖求與穀相結穀鄙而拒
之松年素得宗弼意宗弼當國引松年爲刑部員外郎

望之爲尚書省都事霖爲省令史三人怨穀等時時毀
短於宗弼凡善穀者一切指爲朋黨企先疾病宗弼問
企先誰可繼丞相者企先舉穀而宗弼先入松年譖謂
企先曰此輩可誅企先卒穀出爲橫海軍節度使選人
龔夷鑿除名值赦赴吏部銓得預覃恩穀已除橫海意
憫夷鑿密倒月日署之工部員外郎張子周素與穀隙
嫉霖奏詆專擅朝政下詔獄穀與左司郎中奚毅翰林
待制邢具瞻及王植高鳳庭王傲趙益興龔夷鑿竝論
死徙其妻子及所往來孟浩等三十四人於海上皇統
七年六月也烏祿曩知穀等冤而浩等遇天德赦令還

鄉里多物故惟浩與毅兄毅及王補馮煦王中安在大定二年得召用浩篤實遇事輒言無所隱烏祿嘉其忠不次擢用至尚書右丞兼太子少傅罷爲真定尹卒毅歷利涉軍節度使璟卽位用劉仲洙言追復毅等官及子孫連坐者仲洙宛平人第進士終靖海軍師度使性剛直而訥於言時稱能吏云

梁肅字孟容奉聖州人天眷二年第進士歷事烏祿至吏刑二部尚書使宋定受書儀還擢至參知政事嘗疏論太平時刑罰宜用中典面諫春秋高願罷畋獵爲宗社自重烏祿對宰相言梁肅知無不言正人也故事使

者至宋宋致禮物大使黃金二百兩白金二千兩副使半之幣帛雜物稱是及金制推排物力肅自以身爲執政昔嘗使宋所得禮物多當爲庶民率先乃自增物力六十餘貫時論多之以老請致仕卒謚正惠

移刺子敬字同文博通古今仕海陵至翰林待制嘗受詔監軍於邊遺以俘獲不受海陵以貧而能廉獎之凡同行官僚所取者皆沒入大定中歷祕書少監歷簽書樞密院事出爲河中尹改與中子敬女來與中省謁途遇盜剽掠行李旣而還之謝曰我輩初不知爲府尹家尹有德于民忍侵犯耶徙咸平廣寧尹致仕卒子敬爲

少監時宰相完顏元宜求子敬良馬不與元宜罷政乃以馬贖嘗使宋及諸部進貢所受禮物皆散之親舊既卒家無餘貲其子質宅營葬事云時有移刺慥者本名移敵烈亦以清幹忠正稱大定中爲大理卿先是海陵暴虐紊亂條制慥受詔典領更定爲書十二卷詔頒行之歷刑部尚書西京留守終臨洮尹

賈少冲字若虛通州人家貧勤學道中獲遺金訪其主歸之金徵民兵伐宋少冲甫冠代其叔行雖行伍間未嘗釋卷天眷二年第進士宣徽使劉筈欲以妹妻之力辭曰富貴當自致之其爲定安令也事刺史不少阿歷

河中府判官海陵寢失道少冲知天下且亂秩滿不復求仕大定乃調遷至刑部郎中執奏刑名甚堅再遷祕書少監兼起居注左補闕外柔內剛每從容恒諫十四年聘于宋宋方有祈請常餽之外別致珍異少冲却曰行人敢以賂辱君命乎使還加右諫議大夫終順天軍節度使卒少冲雅不喜言利嘗教諸子曰蔭所以庇身筦庫不可爲也子益亦第進士至節度使

梁襄字公贊絳州人大定第進士爲薛王府掾烏祿將畝金蓮川其地極邊荒涼甚襄上疏極諫曰太康出畝洛汭后羿拒河而失邦魏帝拜陵近郊司馬懿竊權而

纂國武帝幸甘泉遂中江充之奸太宗居九成幾致結社之變隋煬海陵雖惡德貫盈止以離棄宮闕其禍遂速皆可爲殷鑒也反覆凡千六百言烏祿爲罷行襄由是以直道聞累遷保大軍節度使卒襄博學自蚤達至晚貴膳服常淡薄或譏其太儉云子持勝原名詢第進士復中宏詞歷太常博士咸平路宣撫司經歷官興定中宣撫使蒲鮮萬奴蓄異志欲棄咸平持勝力止之萬奴杖持勝八十持勝走告上京行省太平太平已與萬奴通謀詭稱持勝忠署左右司員外郎旣而太平以萬奴旨焚毀上京宗廟執元帥承充奪其軍持勝與治中

裴滿賽不萬戶韓公恕約殺太平等事泄俱被害

張大節字信之五臺人第進士歷東京市令烏祿時判留務甚愛重之烏祿敗元於遼東或勸赴之富貴可一朝遂大節曰自有定分何遽爾隨例補官累遷震武軍節度使致仕卒大節廉勤好學能勉勵後進烏祿稱其剛直忠實果於從政惜乎用之太晚其見知如此

楊伯仁字安道伯雄弟也歷翰林直學士禮部侍郎領脩起居注卒伯仁久在翰林文詞典麗金主烏祿曰自韓昉張鈞後則有翟永固近日則有張景仁鄭子聃今則伯仁而已伯仁善鑒別文章讀孟宗獻發解程文曰

此人當成大名既而宗獻府試省試廷試皆第一號孟
四元云求固字仲堅良鄉人宋取燕舉進士第一金復
取燕中詞賦科海陵時為翰林學士承旨諫伐宋不從
乞致仕大定起歷真定尹致仕鄭子明字景純大定府
人英俊有直氣文章亦然終翰林直學士

內族襄本名唵石魯五世孫參知政事阿魯帶之子也
璟立自右丞相拜左丞相襄被知遇故為將能立功其
駐軍臨潢也有以偽書遺西京留守徒單鎰欲構以罪
書聞金主以書畀襄其明信如此在政府二十年明練
故事簡重能斷器局尤寬大用人各得所長泰和二年

卒謚武昭預配享按金人初起完顏有十二部後皆以
部為氏見於紀錄親者稱宗室疎者稱完顏而異姓同
部亦稱完顏明昌以後避諱不曰宗室而曰內族書名
不書氏其制如此珣即位詔皆稱完顏不復別云

守貞本名左廩希尹之孫也大定中歷上京留守因事
除名烏祿愛其剛直起歷西京留守璟即位自參知政
事進尚書左丞明昌三年以旱災求解職歷西京留守
臺臣劾其不法不報拜平章政事封蕭國公守貞讀書
通法律明習故事時金有國七十年禮樂刑政率因遼
舊雜亂無貫璟任守貞等修正為一代法守貞又喜推

穀善類接後後進金主嘗與泛論人才必迹其心術行事臧否無少隱遂爲胥持國輩所傾蓋指守貞持鎬王求中事久不決也出知濟南府下詔切責承安元年降授河中防禦使以南鄙用兵須大臣安撫乃移知濟南卒守貞爲相日在廷名士皆在其門如遼陽孟奎等號冷巖十俊云後近臣上書願陛下辨君子小人金主問其人曰君子故相完顏守貞小人今參知政事胥持國也

徒單克寧本名習顯萊州人有勇略善騎射通女直契丹字事海陵至曷懶路兵馬都總管大定初從完顏謀

衍討窩幹兩與賊遇皆捷謀衍駐師玩寇克寧斥其非烏祿乃以僕散忠義代謀衍克寧與忠義協謀攻賊平之已而爲山東路兵馬都總管行軍都統屢與宋將魏勝戰竟射殺之取海州及淮陰縣是役也賽刺功居多宋自是懼遂定和議罷兵克寧歷遷平章政事授世襲不扎土河猛安兼親管謀克歷拜太尉左丞相時太孫璟爲右丞相因使克寧輔導之烏祿以克寧言下詔立璟爲皇太孫璟立徙封東平郡王進拜太傅兼尚書令屬疾臨幸拜太師封淄王卒克寧爲相持正守大體其輔導受顧命尤有勞遺表言人君往往重君子而反踈

之輕小人而終昵之願陛下慎終如始安不忘危云謚忠烈圖像衍慶宮配享璟廟

夾谷衡本名阿里不大定中創設女真進士舉衡中第四人遷至修起居注時徒單鎰尼厖古鑑皆出女真進士中衡與二人竝以才傑稱璟立歷參知政事詔賜今名曰汝之所長衡實似之承安二年爲樞密副使行院規畫邊事明年以修完封界賜詔褒諭又明年就拜平章政事封國公卒謚貞獻

張萬公字良輔東阿人正隆二年第進士事烏祿歷刑部侍郎以純直見重璟立歷拜平章政事封壽國公璟

欲李淑妃欲立爲后御史大夫張暉侍御史路鐸坐沮議削官御史姬端脩上書言之杖七十以贖論淑妃竟進封元妃又邊事方殷災異頻仍制度朝更夕改萬公頗嫌畏不敢犯顏強諫累上表以病乞閒不允朝議聽主兵者之請括冒稅民田分給戰士爲屯田萬公上書言不可者五不報泰和以來堅請致仕六年伐宋起知濟南府和議成復致仕未幾卒謚文貞後預配享萬公淳厚剛正門無雜賓典章文物多所裁正輔政八年所薦引多廉讓之士惜其閉於羣說不得行其志焉李愈字景韓正平人中正隆五年詞賦進士第歷事璟

至節度使刑部尚書前後所陳皆省費防邊屯田之策
泰和二年春璟將幸長樂川愈切諫不從夏四月愈復
諫曰北部侵我舊疆千有餘里不謀雪耻復欲北幸一
旦有警臣恐丞相襄樞密副使闍母等不足恃也况皇
嗣未立群心無定豈可遠事逸遊哉璟異其言未幾出
知河中府事致仕卒諡清獻自著狂愚集二十卷

路伯達字仲顯冀州人有器識博學能詩正隆五年第
進士歷事璟論事切時弊遷至太常卿拜武安軍節度
使使宋回獻所得黃金二百五十兩白金一千兩以助
邊未及上卒其妻傅氏言之贈太中大夫仍還其所獻

傅泣請弗許傅以伯達嘗修冀州學乃市信都棗強田
以贍學事聞賜號成德夫人子鐸鈞竝負氣節鐸事璟
爲右拾遺改補闕以鯁切爲宰相所銜補外召爲翰林
脩撰言胥持國不可復用爲相其黨聞之愈怒改監察
御史遷侍御史因事解職復補外久之召爲翰林待制
累除孟州防禦使貞祐初城破投沁水死其文尚奇詩
溫潤精緻號虛舟居士集鈞大定中第進士

裴滿亨字仲通臨潢府人大定末由奉職第進士升奉
御一日烏祿問以上古爲治之道亨奏陛下欲興唐虞
之治要在進賢退不肖信賞罰薄徵斂而已璟卽位擢

宋史新編卷之五十五
監察御史內侍梁道兒恃恩驕橫朝士側目亨奏劾其
姦歷安武軍節度使轉河東南北路按察使隨處有政
績可紀卒贈嘉議大夫

閻公貞字正之宛平人大定七年第進士歷承安至大
理卿兼翰林侍讀學士公貞居法寺幾十年詳慎周密
未嘗有過舉被命校定律令多所是正金人以爲法家
之祖云

楊伯元字長卿尉氏人大定三年第進士歷官安武軍
節度使致仕伯元以才幹被委任凡兩爲推排定課使
累爲審錄官人稱其平每有疑獄必專決遣明辨多中

理卒賜諡曰達

孟鑄大定末補尚書省令史事璟累遷御史中丞奏彈
知大興府事紇石烈執中貪猥擅恣璟頗知其跋扈第
以東宮舊人不深罪也鑄出爲絳陽軍節度使永濟末
年鑄復入臺執中難作召鑄及右諫議大夫張行信俱
至大興府曰汝輩向來彈我者耶二人各以正言答之
執中遣還曰且須後命旣而執中死鑄亦尋卒

趙質字景道大定末舉進士不第隱居燕城南教授爲
業明昌間金主璟遊春水聞弦誦聲幸其齋舍見壁間
題詠賞其志趣召至行殿命之官固辭賜田千畝復之

終身卒年八十五時又有杜時昇者字進之信安人博學知天文宰相數薦不肯仕承安泰和間時昇謂人曰吾觀正北赤氣如血東西亘天天下當太亂亂而南北當合爲一是時風俗侈靡紀綱大壞大定之業衰時昇乃南渡河隱居嵩洛山中從學者甚衆大抵以伊洛之學教人自時昇始正大間潼關拒蒙古甚堅衆皆相賀時昇曰蒙古若假道於宋涉襄漢長驅南陽土崩之勢也已而果然汴京遂不守凡所言皆驗云

宗端脩字平叔汝州人避宗輔諱改宗爲姬好學喜名節大定第進士歷事璟爲監察御史李元妃兄弟干預

朝政端脩上書乞遠小人璟遣李喜兒傳詔問小人爲誰端脩曰小人者李仁惠兄弟仁惠喜兒賜名也越二年復言事削一官歷大理丞知大興府紇石烈執中陳言下大理議端脩斥其言涉私忤旨解職久之爲節度副使卒端脩終以直道不振於時自守愈篤妻死獨居二十年汝州司候游彥哲將之官問政端脩曰不過治氣養心而已彥哲不達端脩曰心正則不私氣平則不暴世以爲名言

張暉字明仲莒州人第進士歷仕大定明昌至右諫議大夫兼禮部侍郎凡吉凶大典及制度因革多暉折衷

承安中爲御史大夫武安軍節度使致仕曄寡欲博古爲禮官二十年最明古今禮學家法爲士族儀表子行簡行信行簡字敬甫大定第進士歷事璟永濟至禮部尚書翰林學士承旨同脩國史珣立進太子太傅致仕卒贈銀青光祿大夫謚文正行簡端慤孝友所著文章十五卷禮例纂一百二十卷會同朝獻禘祫喪葬皆有紀錄及清臺皇華戒嚴爲善自公等記藏于家論者謂張氏父子專門之學爲金儒臣之冠云行信見下

劉從益字雲卿渾源人自高祖攜而下多由科第入仕從益登大安元年進士第歷監察御史忤當路得罪去久之起爲葉令脩學勵俗減荒田之賦以惠民有古良吏風被召授應奉翰林文字卒葉人聞之以端午日罷酒爲位而哭且立石頌德以致哀思從益博學強記精於經學善爲文章尤長於詩有蓬門集子祈字京叔爲太學生有文名值金末喪亂作歸潛志以紀時事元人修金史多採用之

党懷英字世傑馮翊人宋太尉進之裔第進士歷翰林學士改泰寧軍節度使召爲學士承旨致仕卒謚文獻懷英大定末與鳳翔府治中郝侯充遼史刊修官璟卽位頗尚文辭懷英獨被稱獎旣卒遼史未就詔直學士

宋史新編卷一百九十五
陳大任繼成之

宋史新編卷一百九十五

風

宋史新編卷一百九十六

列傳一百三十八

明南京戶部主事莆田柯維騏編

金國三

賈鉉字鼎臣博平人性純厚好問學大定第進士歷左
諫議大夫兼工部侍郎上書言親民之官任情立威甚
者以鐵刀置杖端往往致死上干和氣願下州郡申明
舊章內庭勅斷亦依已定程式從之泰和三年自刑部
尚書拜參知政事事有未當雖已行猶執奏出爲武安
軍節度使改知濟南府致仕終衛紹王之世不復用
孫鐸字振之恩州人與賈鉉同第進士承安泰和中爲

戶部尚書與侍郎張復亨議交鈔請廢勿用辨詰久之
璟謂侍臣曰孫鐸剛正人雖古魏徵何加焉或指以怨
望黜後累遷參知政事左司郎中劉昂等十餘人坐私
議朝政下獄鐸曰昂等無他第如鄭人議鄉校耳璟悟
薄其罪又言鈔法擾民乞罷諸處鈔局從之大安初議
誅黃門李新喜鐸曰此先朝用之太過耳末濟不察即
曰卿今日始言之何耶遷尚書左丞因議鈔法忤旨猶
以論李新喜降黜歷絳陽軍節度使珣立除太子太師
未幾致仕卒

完顏綱字正甫本名元奴泰和六年興兵伐宋綱目宣
徽出為蜀漢路安撫使都大提舉兵事末濟立進尚書
左丞至寧初綱行省事于縉山徒單鎰使人謂之曰末
虎高琪駐兵縉山士皆思奮與其行省親往不如益兵
為使綱不聽鎰復使人止之曰高琪措畫已定彼之功
即行省之功又不聽綱至縉山兵大敗胡沙虎作難遷
末濟于邨命綱子安和作家書使親信人召綱至則數
其失四川敗縉山事殺之貞祐中安和訟冤乃復官綱
不聽徒單鎰之言而及禍功名富貴惑之也

賈益謙字彥亨沃州人本名守謙大定十年詞賦進士
泰和中為吏部尚書衛紹王立拜參知政事胡沙虎弑

衛王立珣益謙歷尚書左丞致仕衛王之弒也一時朝臣皆謂衛王失道天命已絕胡沙虎無罪且有推戴之功至是脩衛王實錄史官遣人訪衛王事於益謙益謙知旨謂之曰知衛王莫如我然我聞大定中禁近能暴海陵螫惡者輒得美仕故當時史官脩實錄多附會衛王爲人勤儉惜名器吾知此而已設欲飾吾言以實其罪吾亦何惜餘年年八十卒

張翰字林卿秀容人大定末第進士歷行省左右司郎中與平章政事獨吉思忠參知政事承裕論議不叶二人行事或乖翰輒爭皆不見省承裕就逮衛紹王知翰

嘗有言召見慰撫之歷事珣爲戶部侍郎蒙古逼中都翰與尚書任天寵規畫調度珣遷汴扈從供饗無缺途中工書言強本足用防亂省事推恩五事略施行歷戶部尚書翰雅有治劇才所至整辦是時初至汴都庶事草創翰經度區處皆有條理卒謚達義

周昂字德卿真定人父天錫第進士至節度使昂亦第進士爲簿令有異政拜監察御史路鐸以言事被斥昂送以詩坐謗訕停廢海上十數年始入翰林言事愈切出佐三司非其所好從宗室承裕軍承裕失利跳走上谷衆欲徑歸昂獨不從城陷與其從子嗣明同死於難

昂平生孝友喜名節學術醇正文章古雅學者師尊之
甥王若虛從學教之爲文曰文以理爲主以詞爲役主
強而役弱則無令不從矣

完顏伯嘉字輔之北京路人明昌第進士歷監察御史
劾奏宰相僕散揆不法興定二年白吏部尚書改御史
中丞金主珣憂旱宰相謂冤獄所致伯嘉奏曰旱熯乃
人君自用亢極之應且燮和陰陽宰相之職顧歸之有
司耶宰相請脩山寨以避蒙古兵伯嘉奏曰獨不見陳
后主之入井乎人臣有忠國者有媚君者忠國者或拂
君意媚君者不爲國謀臣竊論之有國可以有君有君

未必有國也高琪汝礪聞之怒四年秋河南大水伯嘉
以中丞充宣慰副使按行京西御史拮撫其罪下獄會
赦免五年起歷翰林侍講學士坐言事過切謫官逾年
遙授集慶軍節度使權參知政事行尚書省于河中率
陝西精銳復河東卒伯嘉純直不能與時低昂故不安
于朝貞祐以來王擴許古陳規程震完顏素蘭五人皆
起進士多才敢言亦爲宰相及群小所抑有劉炳者貞
祐三年第進士卽日上書陳便宜十事金主復試以保
城邑和兵民通鈔法平物價之術對皆切直不能用但
補御史臺令史而已

承暉字維明本名福興歷刑部尚書改知大興府事宦者李新喜借府中妓樂元妃兄宣徽使李仁惠受賂干囑承暉皆拒之未濟卽位累遷尚書左丞坐承裕會河堡敗績除名珣卽位自尚書右丞拜平章政事兼都元帥遷汴拜左丞相封定國公與太子留守中都蒙古兵復圍中都承暉悉以兵事委平章政事抹撚盡忠已乃持大綱城被圍久太子去右副元帥蒲察七斤降承暉以礮寫奏告急宰相术虎高琪忌承暉成功所遣救援諸將永錫等皆顧望且不知兵中道奔潰承暉辭家廟作遺表付尚書省令史師安石表中歷數當時邪正人

又爲家書以從兄子永懷爲後從容若平日安石將行承暉與飲酒引滿謂之曰承暉於五經皆經師授謹守而力行之不爲虛文遂與之訣仰藥死貞祐三年五月二日也贈太尉尚書令廣平郡王諡忠肅承暉常置宋司馬光蘇軾像於書室曰是吾師友也同時死者兵部尚書知大興府事權參知政事高霖字子約東平人大定進士贈翰林學士承旨諡文簡出走而遇害者戶部尚書任天寵字清叔定陶人明昌進士諡純肅

和速嘉安禮字子敬本名酌大名人穎悟博洽大定第進士爲泰安州刺史貞祐元年蒙古略山東郡縣望風

而遁安禮團練繕完爲守禦計及兵至戰旬日不能下
城破被執不知爲誰或妄以酒監對安禮曰我刺史也
何以諱爲使之跪安禮不屈遂以戈撞其胸而殺之贈
泰寧軍節度使諡堅貞是時觀州刺史高守約亦被執
不屈死贈崇義軍節度使諡忠敬鎮西軍節度使烏古
論德溫亦被執不屈死贈資德大夫諡忠毅定海軍節
度使王維翰與其妻姚氏俱被執不屈俱死贈維翰中
奉大夫姚氏芮國夫人諡貞潔守約遼陽人德溫蓋州
人維翰龍山人俱大定進士也

劉德基大興人貞祐元年特賜同進士出身守官邊邑
夏人攻城德基坐廳事積薪其傍謂家人曰城破卽
我及城破家人不忍縱火遂被執脅使跪降德基不屈
同僚故人給夏人曰此人素病狂德基曰爲臣子當如
此非狂也夏人壯其義乃繫諸獄冀其改圖數日召問
德基大罵曰吾豈苟生者哉乃害之贈朝列大夫同知
通遠軍節度使事

李革字君美河津人穎悟彊記大定末第進士歷事璟
永濟珣至參知政事時貞祐四年蒙古兵破潼關革引
咎罷爲絳陽軍節度使興定元年改知平陽府權參知
政事代胥鼎爲河東行省廷議興兵伐宋革諫宜息民

安邊不納十月蒙古圍平陽徵諸州兵不時至裨將李
懷德縋城出降兵自城東南門入左右請革突圍出革
歎曰吾不能保此城何面目見天子汝輩可去矣乃自
殺贈尚書右丞革爲大興府治中時知府徒單南平貴
倖用事勢傾中外遣所親以進取誘革革拒之其素守
如此

徒單鎰本名按出上京路人大定九年試女直進士及
第爲中都路教授璟卽位由翰林待制累遷平章政事
封濟國公李淑妃兄弟恣橫朝士多趨其門會災異求
言鎰以立五常興五德正薄俗順人心爲對因論爲政

急務其一正臣下之心其一導學者之志璟問侍臣漢
高光優劣鎰曰光武無沈湎冒色之事高祖惑戚姬卒
至于亂蓋微諫也泰和四年罷予郡六年改知京兆府
充宣撫使節制陝西諸將屢破宋安丙軍永濟立自上
京留守拜右丞相監脩國史蒙古入侵鎰畫備禦計不
用遂不可支至寧以病告胡沙虎難作謀諸鎰迎立昇
王珣是爲宣宗拜鎰左丞相廣平郡王授中都路世襲
猛安蒲魯吉必刺謀克諫不宜棄京師而之汴不聽卒
鎰明敏方正學問該貫及門皆名士嘗嘆文士委頓雖
巧拙不同要以仁義道德爲本乃著學之急道之要二

宋史新編卷之五十一
篇大學諸生刻之石有弘道集六卷

把胡魯不詳其所起貞祐四年自參知政事權尚書右丞左副元帥行尚書省元帥府于京兆奏駁朝議取會州爲勞民費財繼又上言禦敵在乎強兵強兵在乎足食今陝西置帥府者九部衆率不過三四千而長校猥多虛糜廩給苟非邊要皆可罷去竝從之蒙古入延安胡魯遣將調兵捍禦城賴以完累遷平章政事正大元年卒贈右丞相東平郡王胡魯爲人忠實憂國奉公及亡朝廷公宰下逮吏民皆嗟惜之

孫德淵字資深興中州人第進士歷沙河令有盜秋桑者主逐捕之盜以又自刺其足面曰秋桑例不禁採汝何得刺我主懼賂而求免盜不從訴之縣德淵曰若逐捕而傷創必在後今在前乃自刺也盜引服丁外艱去官民爲刻石祠之累官河北西路按察轉運使改昭義軍節度使潞州破被執俄有拜于前者皆沙河舊民密護德淵由是得脫貞祐二年拜工部尚書攝御史中丞尋致仕監察御史許古言德淵忠亮明敏請復用未幾卒按金世多良吏德淵以前則有牛德昌李瞻劉敏行傅慎微劉煥高昌福繼後則有蒲察鄭留女奚烈守愚張毅武都紇石烈德張特立竝起進士扶持衰祚諸人

有力焉

王賓字德卿亳州人貞祐進士歷官尚書省令史坐事
罷歸鄉里楊春以州降蒙古而自以羸兵守之賓與前
譙縣尉王進及魏節亭呂鈞謀復其州春遂遁事聞授
進節度使賓同知節亭副使呂鈞判官春以兵來攻月
餘不能拔渡河而北守緒遷蔡賓迎於州北之高安擢
賓行部尚書世襲謀克毫糧儲不充賓常吝惜之適賓
鈞與叅政張天綱聚一樓上議功賞鎮防軍崔復哥等
譁譟登樓天綱問故曰無預相公卽拽賓鈞往市中鈞
且行且跪涕淚俱下賓岸然不懼大叫曰不過殺我乃

並害之節亭及節度判官孫良觀察副使孫九住皆被
害明日又殺節度使王進天綱以便宜授作亂者官亂
乃定是歲也徐州義勝軍校侯通杜正張興率所部降
蒙古蒙古兵至徐行省事徒單益都力戰却之旣而通
亡命正與興慮爲蒙古所圖窮窘自歸益都撫而納之
無何興及義勝統領封仙等作亂推興行省事國安用
隨入徐州殺興推仙爲元帥益都走宿州宿州鎮防軍
校高臘哥等殺節度使紇石烈阿虎父子請益都主帥
事益都不從率將吏西走道遇蒙古兵不屈而死明年
都尉李順兒亦作亂於陳州行省粘葛奴申之死與王

賓事相類云

斜卯愛實字正之登策論進士第守緒卽位累官翰林直學士兼左司郎中愛實憤時相非其人歷數曰白撒擊丸外無一能養不菽麥不分顏蓋世魯居位七八年碌碌備員赤盞合喜一馬軍之材止矣倚注此類曷望中興蒙古絕和好汴京復飭備禦括城中粟旣而罷括粟以進獻取之前御史大夫完顏合周其復進用建言括粟可得百餘萬石遂以合周權參知政事與左丞李蹊總領其事令各家自實書其數于門壯者存石有三斗幼者半之匿者以升斗論罪城中三十六坊皆督以

深刻吏而完顏九住尤酷有貧家寡婦雜蓬糶自給槩以爲罪杖死京師股粟投其餘于糞溷中愛實上奏大略謂罷括粟則改虐政爲仁政散怨氣爲和氣不報自是貧富俱困枕藉而死守緒命出太倉粟作粥以食餓者愛實歎曰與其食之寧如勿奪爲奉御所發又近侍干預朝政將相大臣不敢與之抗愛實上章諫謂此輩使令之材不可預大計近侍泣訴以激怒守緒送有司近侍局副使李大節救解乃赦之出爲中京留守後不知所終

師安石字子安清州人避諱改尹爲師承安五年詞賦

進士爲人輕財尚義受完顏承暉之託爲金主所知累遷御史中丞上書言備禦二事嘉納之坐事奪官守緒卽位連擢尚書右丞會臺諫劾近侍張文壽等三人安石亦論列不已守緒大怒出挫折語安石疽發腦死張行信原名行忠字信甫行簡弟也大定末第進士事衛紹王爲左諫議大夫劾已黜胡沙虎凶悖跋扈不宜復用不報珣卽位行信請立太子繫天下望胡沙虎爲高琪所殺行信上書言正刑賞又劾將帥庸猥不諳師律者二人又請正都監訛可遇敵奔潰之罰皆嘉納中都受兵議和未決行信言宜飭將士拒戰使敵少沮則

和可成珣不能行時以軍食缺詔括官民糧戶存兩月餘悉輸官酬以爵級銀鈔參知政事奧屯忠孝務多得爲功民甚苦之行信以聞遂詔從人便遷山東東路按察使兼轉運使仍權本路宣撫使將行入見奏奧屯忠孝慘刻不忠與胡沙虎爲黨請罷黜逾年改武安軍節度兼冀州管內觀察使上書言四事皆當時急務興定元年拜參知政事時高琪爲相專權用事會宋人來伐諫官許古等議先遣使議和高琪等以爲失體行信歷引先朝故事奏辨高琪不以爲然而高汝礪亦傳會高琪議遂寢明年出爲彰化軍節度使兼涇州管內觀察

使元光初改保大軍移鄜州又改靜難軍移邠州致仕
守緒卽位起爲尚書左丞言事稍不及前人望頓減尋
致仕築亭號靜隱卒于嵩山雖平昔甚媚忌者皆曰正
人亡矣高汝礪者字嚴夫金城人大定第進士守緒時
仍爲相平生以慎密循默固位雖廉潔練達人咸以欺
君目之劉祁曰金自南渡之後爲宰執者率無恢復之
謀臨事低言緩語互相推讓以爲養相體每有四方災
異盜賊將奏必相謂曰恐聖主心困事至危處輒罷散
曰俟再議已而復然或言當改革日以生事抑之故所
用必擇軟熟無鋒鋦易制者蒙古壓境則君臣相對泣

下或殿上發長吁而已兵退則大張具會飲黃閣中因
循苟且竟至亡國祁之言蓋指高汝礪完顏奴申諸人
也

胥鼎字和之尚書右丞持國之子也大定末第進士歷
官有幹濟才至寧初蒙古逼中都鼎以戶部尚書辦軍
饗拜參知政事貞祐初命知大興府兼中都路兵馬都
管民艱食立鬻爵法振之多全活拜尚書右丞金主珣
將南渡以鼎知平陽府兼河東南路兵馬都總管權宣
撫使未幾加本路宣撫使拜樞密副使權尚書左丞行
省于平陽前後屢有建白皆關社稷生靈大計多採納

鼎聞蒙古兵踰關奉詔提兵援京師倍道兼行奏乞委
知平陽府事王質及同知完顏僧家奴權左右監軍以
鎮守河東從之鼎進拜尚書左丞兼樞密副使興定元
年進拜平章政事封莘國公詔鼎舉兵伐宋且令勿復
有言以沮成算鼎已出兵乃疏條伐宋有不可者六謂
宜遴選將士分布近邊州郡敵至則追擊去則力田俟
他日士氣振民心固國用饒自可恢廓先業成中興之
功彼宋何足平耶下尚書省議宰臣以爲諸軍旣進無
復可議遂寢以伐宋功遷一階蒙古兵大舉入陝鼎多
料敵之策朝臣或從中沮之詔樞密不須遙授又遣人

諭鼎曰卿專方面何必每事從中覆徒逗遛也屢請者
進封溫國公致仕守緒卽位起拜平章政事封益國公
行尚書于衛州懇辭優詔不允未幾卒鼎通達吏事所
至鎮以安靜得人心論者謂珣南遷天命已去而未卽
淪喪者鼎與侯摯守禦有力焉

侯摯字莘卿東阿人明昌第進士貞祐初蒙古圍燕都
摯爲中都麴使請出募軍已而以嬰城功擢右補闕不
三年拜參知政事行尚書省于河北摯負應變才多故
之秋累有建白至是自言河北要地防秋在邇願出鎮
撫之故有是命北商販粟渡河官遮糴其什八商遂不

行民餓益甚摯奏罷其令山東紅襖賊郝定僭號陷州郡摯討擒之興定三年設京東西南三路行三司詔摯居中總其事監察御史陳規論摯拔擢太驟勞效無聞且躬按細務失大臣體不報明年遷榮祿大夫致仕守緒卽位兩起爲平章政事封蕭國公行京東路尚書省事未行都堂會議摯以國勢不支因論數事曰只是更無擘劃白撒怒將置之不測曰平章出此言國家何望耶賽不解之曰侯相言甚當白撒憤而罷摯未幾致仕居汴崔立以汴城降蒙古摯遇害摯爲人威嚴善御兵立朝遇事敢言又喜薦士爲南遷後名宰執云

楊雲翼字之美樂平人明昌五年進士第一詞賦亦中乙科事永濟及珣歷禮部吏部尚書改御史中丞嘗駁權油諫伐宋與宰相高琪不合繼而時全復倡議南伐雲翼極陳利害勝負願毋悅甘言毋貽後悔不報全果大敗於淮上一軍盡沒珣愧甚守緒時自翰林學士爲禮部尚書兼侍讀益政院設以雲翼爲選首同翰林學士趙秉文進君臣政要及龜鑑萬年錄雲翼患風痺愈守緒問其方曰但治心耳心和則邪氣不干治國亦然卒謚文獻雲翼自律甚嚴國家事知無不言與趙秉文代掌文柄時人號楊趙兼精術數曆法所著文集及續

通鑑各若干卷周禮辨左氏莊列賦五星聚井辨懸象賦各一篇又有勾股機要象數雜說等書

趙秉文字周臣滏陽人大定第進士明昌六年同知制誥上書論胥持國當罷宗室守貞可大用金主璟召問言頗差異命官鞫之秉文初不肯言詰其僕歷數交遊者秉文乃言嘗與脩撰王庭筠等數人私議庭筠等并下獄決罰時人語曰古有朱雲今有秉文朱雲攀檻秉文攀人坐是又廢後起歷平定州刺史事守緒至翰林學士兼益政院說書秉文年已老日以時事爲憂每聞一事可便民一士可擢用大則拜章小則言之當路殷

懃不能自己積官資善大夫卒秉文自幼至老不一日廢書所著文章有滏冰集資暇錄易中庸語孟及諸子書各有解注又歷富貴自養如寒士晚年頗以禪語自汚或以爲恨云

康錫字伯祿趙州人至寧第進士守緒時爲御史劾近侍局宗室散合輦聲勢熏灼請託公行不可使在禁近聞帥紇石烈牙吾塔鷲很狼戾不喜文儒寮屬有長裾者輒以刀截去自先朝屢敗宋兵威震淮泗恃功跋扈不聽節制朝使至往往陵侮嘗詣省堂詆毀宰執朝廷每優容之又以銀符佩妓屢往州郡求索州將之妻皆

遠迂號省差行首厚賄之錫劾奏謂保全其人宜加裁制竟不問錫後爲河中路治中河中破從時帥率兵南奔濟河船敗死爲人重厚忠實與雷淵冀禹錫齊名賽不金同祖也狀貌魁偉有大略起親衛軍自環至均歷官都總管招討觀察等使屢與宋夏戰有功遷至樞密副使守緒卽位拜平章政事轉尚書右丞楊居仁爲吏部郎中上封事言宰相宜擇人守緒曰此事與郎輩何與侍臣合辭以爲僭賽不徐進曰天下有道庶人猶得獻言况郎官乎居仁乃免譴天興元年候摯在都堂議事觸白撒之怒賴賽不右之語在摯傳拜右丞相致

仕守緒遷歸德復起兼右副元帥封壽國公扈從至歸德又致仕二年起行尚書省事于徐州守將郭恩作亂賽不投河不沒軍士援出之數日自縊于州第子按春正大中充護衛坐罪收係居許州蒙古兵至許按春開門降從蒙古攻汴京已而逃歸詔押入省問事情時賽不爲相奏曰老臣不幸生此賊今日恨不手刀之尚與對面語乎按春行死獄中居仁大興人泰和第進士天興末北渡舉家投黃河死

赤盞尉忻字大用上京人明昌第進士歷參知政事正大初拜尚書右丞守緒欲脩宮室尉忻極諫至以臥薪

嘗膽爲言守緒悚然從之同簽書樞密院事內族撒合
輦以定策功見親信臺諫陳規等每以爲言母后亦戒
飭之守緒終不能去尉忻諫曰姦諛之臣在天子左右
非社稷之福乃出爲中京留守尉忻致仕居汴崔立之
變自縊死年六十三子名董七亦歿於兵間撒合輦妻
獨吉氏當蒙古攻城急自經死遺命焚其屍撒合輦哭
曰夫人不辱我我肯辱朝廷乎因命焚之少頃城破撒
合輦投濠死

劉均林慮人正大九年爲亳州判官州有鎮安軍乃紅
襖餘黨力盡來歸變詐反覆節度使粘哥荆山頗防之

旣以遷民爲軍又請於歸德得甲騎百餘鎮安以爲謀
已乘夜掩殺殆盡荆山出走提控楊春以州降蒙古脅
均同降均佯應之歸其家索朝服服之顧謂妻子曰我
起刀筆吏荷上知拔佐大藩死亦足矣今頭顱如此假
使有十年壽何以見先帝於地下耶仰藥而死

王晦字子明高平人少負氣自意常慕張詠之爲人友
妻與人有私晦手刃殺之第進士歷戶部郎中貞祐初
蒙古兵逼中都或薦晦有將帥才俾募人自將得死士
萬餘護送通州饒入中都有功遷秩以所部兵守順州
通州圍急晦攻牛欄山以解其圍遷翰林侍讀學士加

勸農使未幾順州受兵晦誓不負國將士縋城出降晦
被執不屈遂就死愛將牛斗曰吾豈忍獨生併見殺贈
晦榮祿大夫樞密副使立祠祀之

烏古論德升本名六斤益都路猛安人第進士歷翰林
侍讀權參知政事與平章政事抃盡忠論近侍局干
政忤旨出爲節鎮歷知太原府權元帥左監軍興定元
年蒙古兵攻城急德升屢出戰糧道復通遷官一階二
年蒙古兵復至圍城數日已破濠垣德升植柵爲距散
家貲賞戰士及壞城西北隅以入德升聯車塞之三却
三登矢石如雨力窮城陷德升至府署與其姑及妻訣

自縊死姑及妻同自殺贈翰林學士承旨後數年有完
顏褚兒者從守緒爲南面元帥戰死黃陵岡妻尹氏聞
褚兒死盡焚家貲自縊

馮延登字子俊吉鄉人登詞賦進士第正大七年十二
月遷國子祭酒假翰林學士承旨充國信使以八年春
奉國書見蒙古主窩闊台於虢州軍中窩闊台問汝識
鳳翔帥否對曰識之又問何如人對曰敏於事者也又
問汝能招之使降卽貰汝死對曰招降非使職也明日
復再三問不爲屈又明日亦然叱左右以刀截去其鬚
眉延登岸然不動乃監之豐州踰二年放還歷刑部尚

書明年蒙古圍汴京延登倉卒逃難爲騎兵所獲擁之
北行延登辭情慷慨義不受辱躍城傍井中死時有宋
可者字予之武陟人輕財重義爲鄉里所推蒙古兵駐
山陽聞其名訪知所在質其子使人招之曰不我從汝
子死矣親舊競勸之往可皆謝不從曰吾有子無子與
吾子死生皆有命焉豈以一子故併平生所守亡之乎
後竟以無子

烏古孫仲端字子正本名卜吉登策論進士第歷官權
參知政事坐忤旨貶守緒將遷歸德召爲翰林學士承
旨留守汴京蒙古圍汴日久仲端度事變不測一日與

同年裴滿思忠小飲談曩事以爲笑因數言人死亦易
事思忠詰其故乃書一詩示之大意謂人生大似巢燕
或在華屋杏梁或在村居茅茨及秋社甫臨皆當逝去
人生雖有富貴貧賤不同要之終有一死耳書竟連飲
數杯送思忠出門曰此別終天矣即日自縊其妻亦從
死明日遂有崔立之變時有張潛者字仲升武清人少
慕豪俠及壯折節讀書敦行誼年五十始娶魯山孫氏
夫婦相敬如賓家故貧負薪拾穗行歌自得非義一介
不取里人目曰張古人天興間挈家避兵少室山不食
七日死孫氏亦投絕澗死焉

蒲察琦本名阿隣字仁卿陽信人以刑部掾襲謀克性
好讀書知古今事守緒遷歸德汴京立講議所琦與其
選與同事元好問交相得崔立變後令改易巾髻琦謂
好問曰此事在京人皆可獨琦不可今以一死付公然
死則卽死付公一言亦剩矣遂涕泣而別琦至其家母
方晝寢驚而寤琦曰阿母何爲母曰適夢三人潛伏梁
間故驚寤琦跪曰梁上人鬼也兒意在懸梁母夢先見
耳家人輩泣且勸曰君獨不念老母歟母曰毋庸勸兒
所處是矣卽自縊母完顏氏以孝謹稱
王浩由吏起身初辟涇陽令廉白爲關輔第一有善政

民絲毫無所犯秦人爲立生祠南遷後爲扶溝令開興
初縣民錢大亨等執縣官送款于蒙古大亨以浩有恩
於民不忍加刃日遣所知勸之降浩終不聽於是殺之
無血簿劉坦尉宋乙竝見害棄死道傍自春徂夏獨浩
屍儼然如生日且不暝烏犬莫敢近殆若有神護者時
又有石抹元趙重福皆起於吏歷轉運使以循良稱
陀滿胡土門字子秀登策論進士第爲翰林待制正大
三年爲臨洮總管四年蒙古攻城城破被執誘之降不
應使之跪不從以刀亂斫其脛終不屈遂殺之贈中京
留守妻烏古論氏崔立之變縉紳婦女多爲所污烏古

論氏自縊謂家人曰我豈敢辱吾夫與吾兄乎蓋其兄伯祥登朝亦有盛名云當崔立時奉御完顏忙哥與其妻溫持罕氏訣曰吾寧死不能受辱妻曰君爲國家死我不能爲君死乎一婢曰主死婢將安歸是日夫婦以一繩同縊婢從之又有總領完顏長樂之妻蒲察氏參政完顏素蘭之妻竝從容縊死于室以避崔立均謂之烈婦焉按金有中原以來若義豐介李寶信妻王氏御史中丞李英妻張氏縣司吏相琪妻樂氏進士張慥妻馮氏司諫許古妻劉氏與其二女皆不爲盜賊所污而死若康住住之自盡雷婦師氏之投井李婦史氏之投

塵皆不肯事二夫者豈其俗沾被先王之遺風千載猶未泯歟

聶天驥字元吉五臺人第進士性簡靜不妄交雅道自將不畏權倖歷右司郎中守緒遷歸德天驥留汴中崔立之亂被創甚臥旬餘其女舜英謁醫救療至割股肉以進天驥嘆曰吾幸得死兒女曹尚欲我活耶竟鬱鬱死女葬父之明日亦自縊死女適進士張伯豪而寡歸父家年尚少云

張天綱字正卿益津人至寧詞賦進士直性正論造次不少變累擢權參知政事扈從至蔡妖人烏古論先生

身見新編卷之三
三
裸顛露足佯爲狂態金主珣嘗召問祕術因出入戚里大臣家頗有穢迹守緒敕有司掩捕遁去蔡帥烏古論鎬爲所惑營道宇居之守緒將至蔡生欲遁無所往乃自言能使軍士服氣不費糧右丞完顏仲德欲假以駭敵天綱力辨以爲不可守緒乃止生自詭有退敵策求入見長揖大言欲出說爲脫身計朝臣具言往日之奸守緒殺之且曰向非張天綱幾爲此賊所誑蔡城破天綱爲宋將所得至臨安命知府薛瓊詰問答辭不屈理宗召見曰天綱真不畏死耶對曰大丈夫患死之不中節耳何畏之有因祈死不已理宗不聽有司令供狀必

書虜主天綱但書故主而已後不知所終時烏古論鎬亦被執以招息州不下爲所殺

完顏仲德本名忽斜虎合懶路人泰和第進士歷事守緒累以樞密行院兼元帥府事所至增城浚濠列柵屯田流亡來歸道不拾遺授鞏昌行省天興元年拜工部尚書參知政事行省陝州守緒徵諸道兵入援仲德提孤軍千人擷果菜爲食間關百死至汴至之日適守緒東遷妻子在汴五年矣仲德不入其家趨見守緒於宋門知欲北渡諫不如西幸秦鞏不聽進尚書右丞兼樞密副使守緒自歸德遷蔡以仲德領省院徵兵繕甲未

嘗一日無西志左右幸安率妻營業每沮西行仲德常以爲恨守緒命有司脩見山亭及同知衙爲遊息之所又選室女備後宮仲德連諫大意謂無恢復之略人心將懈弛乃皆罷之仲德御軍嚴軍校有驕悍者小則決大則誅迄于國亡不敢越紀律蔡被圍以來仲德日夕督戰西城連破仲德率精兵巷戰旣聞守緒自縊遂赴汝水死參政李木魯婁室兀林荅胡土總帥元志元帥王山兒紇石烈栢壽烏古論桓端及軍士五百人皆從死仲德在軍旅手不釋卷家素貧敝裘糲食終其身云

石抹世勣字景略詞賦經義兩科進士貞祐中累官太常丞預講議所事時徙河北軍戶於河南宰相議給田世勣上言不便侍御史劉元規亦以爲言乃罷之歷禮部尚書兼翰林侍講學士天興元年守緒將北渡世勣率朝官劉肅田芝等二十人求見諫止守緒曰外無良將安得不自行又指御榻曰此行豈有還期但恨我無罪亡國耳我未嘗奢侈未嘗信任小人世勣應聲曰陛下用小人則亦有之守緒詰其人世勣歷數移刺粘占溫敦昌孫元散惹完顏長樂以對世勣扈從子嵩亦爲應奉翰林文字蔡城破父子俱死嵩經義進士也

王若虛字從之棗城人經義進士也歷翰林直學士天
興二年崔立以汴京降蒙古附和者請爲立功德碑翟
奕以尚書省命召若虛爲碑文若虛自計必死姑先以
理喻之乃謂奕曰功德當指何事奕怒曰活百萬生靈
非功德而何若虛曰學士代王言此非其職也奕輩不
能奪以屬太學生劉祈麻革旣草定左司員外郎元好
問意未愜乃自爲之文成以示若虛共刪定數字止直
敘其事而已後蒙古兵入城不果立金亡若虛微服北
歸鎮陽遊東山樂其勝自謂仙府因垂足憩石上瞑目
而逝年七十所著號慵夫集滹南遺老集

元好問字裕之秀容人父德明甘貧好學累舉不第以
山水詩酒自娛所著有東巖集好問淹貫經傳工詩文
從郝天挺問業興定五年第進士歷行尚書省左司員
外郎金亡不仕所作七言古樂府不用古題挾幽并慷
慨之氣兵後故老皆盡好問蔚爲一代宗工晚年構亭
纂輯金源事跡名曰野史又有中州集壬辰雜編云天
挺字晉卿陵川人多病厭科舉不復充賦謂好問曰讀
書不爲藝文選官不爲利養唯通人能之又曰仕以貪
敗皆苦飢寒丈夫不耐飢寒一事不可爲貞祐中居洛
陽爲人有崖岸耿耿自信寧窮困終不一至富豪之門

焉

宋珪本名乞奴燕人爲內侍殿頭頗知書珪嘗以元夕欲觀燈戲命珪監作珪評語云社稷棄之中都南京作燈戲有何看耶珪杖之尋悔守緒放鵠後苑鵠逸市中與之直乃得事聞守緒欲治其人珪諫曰貴畜賤人豈可宣示四方守緒杖之尋亦悔及守緒爲官奴所制珪以計誅之蔡城破珪與完顏斜烈焦春和等皆從死時有守恒者亦內侍也守緒自蒲城遷歸德道次民家守恒進櫛曰願還宮之日無忘此草廬中守緒爲咨嗟久之君子謂珪與守恒二人者其鐵中之錚錚耶

金之境土東極吉里迷兀的改諸野人之境北自蒲與路之北三千餘里火魯大暗謀克地爲邊右旋入秦州婆盧火所浚界濠而西經臨潢金山跨慶桓撫昌淨州之北出天山外包東勝接西夏逾黃河復西歷葭州及米脂寨出臨洮府會州積石之外與生羌地相錯復自積石諸山之南左折而東逾洮州越鹽州堡循渭至大散關北竝山入京兆絡商州南以唐鄧西南皆四十里取淮之中流爲界而與宋爲表裏初都會寧按出虎河之源出焉其俗言金爲按出虎故國號亦曰金源貞元都燕正隆都汴大定復都燕貞祐復都汴路分十九上

京路有會寧府肇隆等州金之舊土也咸平路有成平
府韓州東京路有遼陽府澄瀋等州北京路有大定臨
潢等府瑞慶等州西京路有雲朔等州中都路有幽薊
等州皆取之遼者也河南路卽南京路有開封歸德府
鄧蔡等州河北東路有河間府深冀等州河北西路有
真定彰德府邢洺等州山東東路有益都濟南府海密
等州山東西路有東平府徐濟等州大名府路有大名
恩濮等州河東北路有太原府晉汾等州河東南路有
平陽河中府隰絳等州京兆府路有京兆府商虢等州
鳳翔路有鳳翔平涼府秦隴等州鄜延路有延安府鄜

延等州慶原路有慶陽府環邠等州臨洮路有臨洮府
蘭鞏等州皆取之宋者也建五京置十二總管府其間
節鎮三十六防禦郡二十二刺史郡凡七十三州凡百
七十九縣凡六百八十三蒲與路合懶路恤品路曷蘇
館路胡里改路各置總管隸上京者也婆速府路總管
隸東京者也部族節鎮八詳穩九群牧十有二隸西京
者也內外官名初猶繫以本國語亦有雜遼人者官長
曰勃極烈上加都者總百官也加諳班者尊且貴也加
國論者尊禮優崇也加胡魯者統領也加移賚者位在
第三也加阿買者治城邑也加乙室者主迎逢也加札

失哈者守官署也加昷者司陰陽也加迭者倅貳也曰
乂曰詳穩者職邊戍也曰謀克者百夫長也曰猛安者
千夫長也曰移里董者部落墟砦之首領也曰禿里者
掌部落獄訟也天眷改定官制悉用中國之號獨猛安
謀克世襲猶仍其舊盛時版籍凡女真契丹漢戶七百
六十八萬五千口千五百八十一萬七千丁壯盡簽爲
兵平居聽以佃漁射獵習勞有警徵發車騎仗糗皆取
備部長曰孛董行兵則曰猛安謀克猛安之上置軍帥
時亦稱軍帥爲猛安軍帥之上置萬戶萬戶之上置都
統都統之外又設總領故稱元帥爲總領神策等軍爲

名三十二外又招燕趙亡命爲忠義軍籍諸路歸正人
及諸路所虜臨陣所獲爲忠孝軍如曰奚軍曰乂軍曰
渤海軍皆遼舊名也天會入汴宋之禮器樂器及經史
圖籍悉爲所得於是興禮樂立庠序隆宣聖之祀曆法
初用宋紀元曆稍增損之正隆以後始命趙知微改脩
至於大定明昌典章文物粲然與中國埒其用女真舊
音度曲夫固不忘土風而端午中元重九行拜天禮畢
則射柳毬塲斯猶承踵遼俗耳娶后嫁女不出數部長
曰徒單氏挈懶氏唐括氏蒲察氏裴滿氏紇石烈氏僕
散氏烏林答氏烏古論氏選舉諸科尤重進士而及第

出身或歎操行不得授清銜若乃以策論進士取國人
而用女真文字爲程文蓋就所長以收其用又欲行其
國字令通習而不廢官田有租私田有稅租稅外筭園
廬畜牧及藏糴多寡徵錢曰物力物力之徵自公卿至
庶人無免者近臣出使外國例受餽遺歸必增物力錢
猛安謀克戶又有所謂牛頭稅者宰臣有納此稅庭陛
間諮及增減則州縣徵求可知用刑以杖折徒累及二
百有司奉法至置刃杖端虐於肉刑士大夫雖微過往
往受決蓋欲強主威也珣棄燕遷汴後弊政尤多其大
者用奉御採訪民間號行路御史多被中傷又軍中監

戰動有牽制蓋蹈唐之覆轍云

論曰仲尼有言裔不謀夏夷不亂華漢唐以來匈奴突
厥吐蕃回鶻雖嘗爲中國患未有若女真之慘以烈也
初宋約攻遼高麗以虎狼戒之而徽宗自撥其患悔不
可追汴京失守虜二帝暨族屬五百人宗社南遷中原
陷焉一時黠將粘罕謀力居多他日與吳乞買子孫竝
遭海陵荼毒無噍類末年蒙古連破燕汴所俘掠屠戮
尤甚靖康時而孟珙夾攻守緒灰骨完顏之祀忽諸佳
兵好還在宋亦可以釋憾也夫

宋史新編卷一百九十六

宋史新編卷一百九十七

列傳一百三十九

明南京戶部主事莆田柯維騏編

外國

夏國

夏之先出党項部落以十數而拓拔最彊唐有拓拔赤
 辭者以地內屬太宗以為西戎州都督居松州賜姓李
 後畏吐蕃之逼請內徙乃置靜邊等州處之其析居夏
 州者號平夏部天寶末平夏部有戰功擢容州刺史天
 柱軍使裔孫思恭咸通末據宥州謀討黃巢得權知夏
 綏銀節度使賊平封夏國公復賜李姓累傳至彝興加

定難軍節度使歷晉漢周加中書令封西平王累加太傅宋初加太尉卒贈太師追封夏王子克睿立彝與本名彝殷克睿本名光睿避宋諱也克睿授定難軍節度使率兵破北漢砦獻其俘累加檢校太尉卒贈侍中子繼筠立授檢校司徒定難軍節度觀察留後卒弟繼捧立率族人入朝繼捧陳其諸父昆弟多怨願留京師乃遣使夏州護赴闕授繼捧彰德軍節度使繼捧之人也弟繼遷出奔後數爲邊患有言繼遷悉知朝廷事蓋繼捧泄之乃出爲崇信軍節度使端拱初改感德軍旣而用宰相趙普計令繼捧圖繼遷因召繼捧赴闕賜姓趙

氏更名保忠授夏州刺史充定難軍節度使夏銀綬宥靜等州觀察處置押蕃落等使賜賚甚厚至鎮數月上言繼遷悔過歸款加保忠特進同中書門下平章事淳化五年繼遷攻靈州遣李繼隆討之保忠先攜家壁野外上言與繼遷解怨乞罷兵帝立遣中使督繼隆進軍而保忠反爲繼遷所圖欲併其衆保忠走還城繼隆執保忠送闕下帝詰責數四釋之尋責授右千牛衛上將軍封宥罪侯遷金吾衛上將軍判岳州移復州景德元年卒贈威塞軍節度使

繼遷繼捧族弟也高祖思忠嘗從兄思恭討黃巢拒賊

宋史新編卷一百一十五
於渭橋表有鐵鶴射之沒羽賊駭之遂先士卒戰沒唐
僖宗贈宥州刺史祠于渭陽曾祖祖暨父俱仕于五代
繼遷生而有齒開寶七年授定難軍管內都知蕃落使
繼捧歸宋時繼遷年二十留居銀州及太宗召總麻親
赴闕乃奔地斤澤太平興國八年知夏州尹憲與都巡
檢曹光實夜襲破之焚四百餘帳繼遷遁免獲其母與
妻繼遷復連娶豪族轉遷無常漸以彊大西人以李氏
世著恩德多歸之繼遷遂與弟繼冲起夏州乃詐降誘
殺曹光實于葭蘆川遂襲銀州據之雍熙二年二月也
三年契丹以女嫁繼遷用爲夏國王淳化初奉表歸款

授銀州觀察使賜姓趙名保吉子德明管內蕃落使行
軍司馬其後繼遷復叛詔遣李繼隆等進討隨削所賜
姓名至道初繼遷遣左都押衙張浦獻橐駝良馬太宗
遣使拜繼遷鄜州節度使不受乃以浦爲鄜州團練留
京師繼遷以千騎攻清遠軍守臣張延擊退之二年春
命洛苑使白守榮等護送芻粟四十萬于靈州繼遷邀
擊于浦洛河運餽盡爲所得太宗聞之怒親部分李繼
隆等五路進討真宗立繼遷請降乃復姓名授夏州刺
史定難軍節度夏銀綏宥靜等州觀察處置押蕃落等
使加食邑實封益功臣號張浦亦遣還繼遷遣弟繼瑗

來謝授繼瑗亳州防禦使封繼遷母衛慕氏衛國太夫人子德明爲定難軍節度行軍司馬未幾復抄邊咸平五年繼遷集蕃部攻陷靈州以爲西平府六年春都靈州詔議和割河西銀夏等五州與之六月復圍麟州詔金明巡檢李繼周擊之知州衛居寶出奇兵突戰乃拔去遂攻西蕃取西涼府時都首領潘羅支僞降繼遷受之不疑景德元年羅支集六谷蕃部合擊繼遷大敗中流矢卒年四十二德明立上尊號曰應運法天神智仁聖至道廣德孝光皇帝元昊追謚曰神武廟號太祖德明小字阿移母野利氏立時年二十三稍知慕宋累

奉表歸順逾年復奉誓表請藏盟府乃授特進檢校太師兼侍中持節都督夏州諸軍事行夏州刺史上柱國充定難軍節度夏銀綏宥靜等州管內觀察處置押蕃落等使西平王食邑六千戶食實封一千戶仍賜推忠保順亮節翊戴功臣遣使錫賚因責子弟入質德明謂非故事不遣乃獻御馬及散馬橐駝以謝大中祥符初以東封遣使來獻累加兼中書令益食邑實封時契丹亦遣使冊德明爲大夏國王三年境內饑表求粟百萬事具王旦傳後因大禮進中書令又加守大保又加宣德功臣九年表云自向敏中歸闕張崇貴云亡後來邊

臣罕守舊制各務邀功漸乖盟約詔答之天禧初加守太傅三年加崇仁功臣五年契丹復加尚書令乾興元年加純誠功臣仁宗卽位加尚書令德明娶三姓衛慕氏生曩霄天聖九年德明卒年五十一宋贈太師尚書令兼中書令遣使奠賻帝與皇太后成服于苑中曩霄立謚曰光聖皇帝廟號太宗

曩霄本名元昊小字鬼理國語謂惜爲鬼富貴爲理性雄毅多大略善繪畫能剝製物始曉浮圖學通蕃漢文字案上置法律常攜野戰歌太乙金鑑訣弱冠獨引兵襲破回鶻夜洛隔可汗王奪甘州遂立爲皇太子數諫

其父母臣宋父輒戒之曰吾父用兵疲矣吾族三十年衣錦綺此宋恩也不可負元昊曰衣皮毛事畜牧蕃性所便英雄之生當王霸耳何錦綺爲德明卒授以父職襲父封明號令以兵法勒諸部衣白窄衫氍冠紅裏冠頂後垂紅結綬自號鬼名吾祖其官分文武班冠服各別自中書令宰相樞使大夫侍中太尉已下皆分命蕃漢人爲之每舉兵必率部長與獵有獲則下馬環坐飲割鮮而食各問所見擇取其長初宋改元明道元昊避父諱稱顯道於國中景祐元年遂攻環慶路殺掠居人下詔約束之是歲改元開運踰月或告以石晉敗亡年

號也乃改廣運母死遣使來告哀宋亦遣使弔贈慶州柔遠砦蕃部巡檢鬼通攻破後橋諸堡於是元昊稱兵報仇環慶路都監齊宗矩被執久之始放歸明年加兼中書令元昊既悉有夏銀綬宥靜靈鹽會勝甘涼瓜沙肅而洪定威龍皆卽堡鎮號州以興州爲都阻河依賀蘭山爲固始大建官以鬼名守全張陟張絳楊廓徐敏宗張文顯主謀議以鍾鼎臣典文書以成逋克成賞都臥馱如定多多馬竇惟吉主兵馬野利仁榮上蕃學置十二監軍司委豪右分統其衆分兵以備遼又備環慶又備鄜延又備西蕃回紇又駐兵爲鎮守總五十餘萬

元昊自製蕃書命野利仁榮演繹之成十二卷字形體方整類八分而畫頗重複教國人紀事用蕃書而譯孝經爾雅四言雜字爲蕃語復改元大慶宋寶元元年表遣使詣五臺山供佛實欲窺河東道路與諸豪軟血約先攻鄜延欲自靖德塞門砦赤城路三道竝入遂築壇受冊卽皇帝位時年三十明年遣使上表曰臣以狂斐制小蕃文字改大漢衣冠禮樂旣張器用旣備吐蕃塔塔張掖交河莫不從伏輻湊屢期山呼齊舉再讓靡遑群集又迫事不得已顯而行之伏望皇帝陛下許以西郊之地冊爲南面之君敢竭愚庸常敦歡好魚來鴈往

任傳鄰國之音地久天長永鎮邊方之患詔削奪官爵
互市元昊又遣賀宋年齋嫚書納旌節及所授敕告置
神明匣留歸孃族而去康定元年屢寇邊執將校事在
仁宗本紀慶曆元年二月攻渭州韓琦命任福桑懌等
併擊之福與懌循好水川西去未至羊牧隆城五里與
夏軍遇懌爲先鋒見道傍置數銀泥合封襲謹密中有
動躍聲疑莫敢發福至發之乃縣哨家鴿百餘自合中
起盤飛軍上於是夏兵四合懌先犯中軍繼之自辰至
午酣戰陣中忽鮑老旗長二丈餘懌等莫測旣而鮑老
揮右則右伏出揮左則左伏出翼而襲之宋師大敗諸

將連戰沒事具任福傳是役死者萬三百人關右震動
軍須日廣三司告之仁宗爲之旰食秋夏人轉攻河東
及麟府不克乃引兵攻豐州城孤無援遂據之元昊雖
數勝然死亡創痍相半人困於點集財力不給國中爲
十不如之謠以怨之元昊乃歸塞門砦主高延德因乞
和知延州范仲淹爲書喻以禍福元昊復書語猶嫚時
知延州龐籍謀招附而知青澗城种世衡用計遺野利
旺榮書遂稱臣如舊事具世衡傳三年復大入戰于定
川宋師大敗葛懷敏死之直抵渭州焚掠而去復詔籍
招納元昊以書議和然不肯削僭號且云如日方中止

可順天西行安可逆天東下詔籍復書許之明年遣使
來猶稱男邦泥定國兀卒上書父大宋皇帝更名曩霄
而不稱臣兀卒卽吾祖也如可汗號議者謂改吾祖爲
兀卒特以侮玩朝廷不可許詔遣使更議且許封冊爲
夏國主而元昊亦遣使繼來四年契丹以元昊納叛討
之遣使來告元昊始上誓表稱臣凡歲賜銀綺絹茶二
十五萬五千如常數許之未幾元昊與契丹和事在遼
國傳宋乃遣使行冊禮賜夏國主印約稱臣奉正朔改
所賜敕書爲詔而不名許自置官屬使至其國用賓客
禮置榷場于保安軍及高平砦第不通青鹽然宋每遣

使往但館于宥州終不復至興靈而元昊帝其國中自
若也八年二月卒年四十六宋遣使如故事厚賜馬元
昊生以五月五日凡五娶初娶契丹主宗真女其二沒
藏氏生諒祚改元曰開運曰廣運曰大慶曰天授禮法
延祚凡十七年諒祚立諡曰武烈皇帝廟號景宗

諒祚小字甯令哥國語謂歡嘉爲甯令兩岔河名也母
從元昊出獵至此生諒祚遂名焉立時方期歲冊爲夏
國主嘉祐元年母薨遣使弔慰諒祚幼養于母族訛龐
訛龐因專國政初麟州西城枕睥睨曰紅樓下瞰屈野
河其外距夏境尚七十里而田腴利厚多入訛龐歲東

侵不已至耕穫時輒屯兵二年知麟州武戡築堡于河西以爲保障戡與夏人戰兵潰戡走兵馬監押劉慶等被執安撫司議疆事而訛龐鰲不聽久之乃合議築堠九更新邊禁要以違約則罷和市自此始定諒祚忌訛龐專或告將叛殺之夷其族已而請去蕃禮從漢儀云當以此迎使者詔許之七年夏使至稱宣徽南院使詔戒其僭擬夏使表求太宗御製草詩隸書石本且進馬五十匹求九經唐史冊府元龜詔惟賜九經還所獻馬治平元年求復榷場不許遂出兵秦鳳涇原抄熟戶擾邊塞詔問之諒祚遷延弗受已而獻表歸罪宋邊吏三

年大舉攻大順城圍柔遠皆燒屈乞村柵蕃官趙明擊退之詰之乃獻方物謝罪時英宗崩神宗立遣使賜遺留物諒祚遣使弔慰進助山陵是年十月种諤取綏州脇降族帳諒祚詐爲會議誘殺知保安軍楊定等事聞命韓琦知永興軍經略西方諒祚錮送殺定者數人十二月諒祚卒年二十一改元曰延嗣寧國曰天祐垂聖曰福聖承道曰禪都曰拱化凡二十年子秉常立諡曰昭英皇帝廟號毅宗

秉常立時年七歲母梁氏稱太后攝政熙寧元年殺楊定者李崇貴至云定奉使諒祚常拜稱臣且許歸沿邊

熟戶諒祚遺之寶劍寶鑑及金銀物初定之歸以劍鑑上而匿金銀言諒祚可刺帝喜擢知保安既而夏人失綏州以爲定賣已殺之至是事露帝薄崇貴等罪而削定官沒田宅萬計二年二月遣使冊秉常爲夏國主三月進誓表乞班誓詔及請以安遠塞門二砦易綏州初朝議欲官其首領計分其勢及是秉常不受詔來言曰上方以孝治天下奈何教小國之臣叛其君乃罷前議賜誓詔而夏主受冊不歸二砦且欲先得綏州又不欲交地界於是易砦之議亦罷詔城綏州八月表請去漢儀復用蕃禮從之三年五月夏人號十萬築開訛堡知

慶州李復圭遣將出戰爲所敗復出兵邛州堡又襲金湯而夏人已去惟殺其老幼一二百人告捷而邊怨大起矣八月夏人遂大舉入環慶鈐轄郭慶高敏魏慶宗秦勃等死之四年正月种諤謀取橫山先城囉兀既而夏人陷新築諸堡殺將士詔棄囉兀城九月夏遣使入貢且乞綏州易二砦如舊約詔不允五年閏七月城武勝元豐四年四月有李將軍清者本秦人說秉常以河南地歸宋國母知之遂誅清而奪秉常政鄜延總管种諤乃疏夏國有亂宜興師問罪此千載一時之會帝然之遂詔熙河李憲等大舉征夏王中正提兵六萬出麟

州高遵裕將步騎八萬劉昌祚將卒五萬出慶州諤將
鄜延及畿內兵九萬出綏德城九月諤圍米脂夏人來
救戰于無定川大破之斬首五千級十月遂克米脂降
其守將中正度無定河循水北行地皆沙濕士馬多陷
沒遂繼諤趨夏川而民皆潰軍無所得遵裕至清遠軍
攻靈州夏人決黃河灌營復抄絕餉道士卒凍溺死餘
兵纔萬三千人遂歸夏人追戰將官俞平死之中正至
宥州奈王井糧盡士卒死亡者已二萬乃引軍還諤兵
無食會大雪凍死入塞者纔三萬人獨昌祚遇夏人于
磨臍隘分兵渡葫蘆河奪其隘與統軍國母弟梁大王

戰遂大破之憲營于天都山下焚夏之南牟內殿并其
館庫追襲其統軍仁多陵丁敗之擒百人遂班師初夏
人聞宋大舉梁氏問策于廷一老將曰堅壁清野縱其
深入聚勁兵于靈夏而遣輕騎抄絕其餽運可不戰而
困也梁氏從之宋師卒無功五年五月沈括議築永樂
城永樂依山無水泉种諤等極言不可徐禧率諸將竟
城之賜名銀川砦屬曲珍守之永樂接宥州附橫山夏
人必爭之地九月夏人來攻禧乃挾李舜舉來援而夏
兵至者號三十萬翌日夏兵漸逼縱鐵騎渡河號鐵鷁
子震盪衝突大兵從之禧師敗績將校寇偉李思古高

世才夏儼程博古及使臣十餘輩士卒八百餘人盡沒
夏人進圍城城中乏水鑿井不得泉竭死者大半援兵
及餽運皆爲所隔城遂陷高永能戰沒禧舜舉運使李
稷皆死於亂兵惟曲珍王湛李浦呂整裸跣走免蕃部
指揮馬貴獨誓死殺數十人而沒是役也死者將校數
百人士卒役夫二十餘萬夏人乃耀兵米脂城下而還
宋自熙寧用兵以來凡得葭蘆吳保養合米脂浮圖塞
門六堡而靈州永樂之役官軍熟羌義保死者六十萬
人錢粟銀絹以萬數者不可勝計帝臨朝痛悼而夏人
亦困弊夏西南都統昴星嵬名濟迺移書劉昌祚謂夏

國提封二萬里帶甲數十萬南有于闐作我歡鄰北有
大燕爲我強援若乘間伺便角力競鬪雖十年豈得休
哉至於魯國之憂不在顓臾隋室之變生於楊感此皆
明公得於胸中不待言而後喻今天下倒垂之望正在
英才何不進讜言闢邪議使朝廷與夏國歡好如初主
民重見太平豈獨夏國之幸乃天下之幸也昌祚上其
書帝喻答之六年二月夏人大舉圍蘭州敗走五月復
來圍侍禁韋定死之六月遣使請修貢詔歲賜如舊七
年復圍蘭州攻德順軍及諸砦事在神宗紀八年三月
神宗崩賜以遺留物七月遣使來奠慰十月母梁氏薨

計至亦遣使奠慰夏以主母遺留物來進元祐元年二月始遣使入貢五月遣使來賀卽位六月復遣使來求所侵蘭州米脂等五砦蘇轍兩疏請因其請地而與之司馬光亦言羣臣見小忘大守近遺遠惜此無用之地使兵連不解願決聖心爲兆民計文彥博議亦與光合遂從之秋七月乙丑秉常卒年三十改元曰乾道曰天賜禮盛國慶曰大安曰天安禮定凡二十年子乾順立諡曰康靖皇帝廟號惠宗

乾順母梁氏生甫三歲立遣使告哀詔元豐所得城砦待歸我陷執民當給還乃遣使奠慰夏亦遣使進馬駝

來賀龍興節元祐二年正月遣使册乾順爲夏國主仍節度西平王七月夏人攻鎮戎軍諸堡三年以後累寇諸堡五年二月歸永樂所獲吏士百五十人遂以葭蘆米脂浮圖安疆四砦與之而畫界未定明年六月復來言詔諭如約九月夏人復圍麟府都監李儀等盡沒七年屢攻綏德城以重兵壓涇原境留五旬大掠八年復遣使以蘭州一境易塞門二砦詔數其違順不常却之紹聖元年復請詔不允三年九月大入鄜延十月忽自長城一日馳至金明列營環城國主子母親督桴鼓縱騎四掠金明乃破守兵二千八百人惟五人得脫城中

糧積皆盡將官張俞死之元符二年梁氏薨遼遣使爲
夏人議和夏人因上表謝過繼進誓表詔報歲賜仍舊
三年哲宗崩徽宗立夏遣使來奠慰及賀卽位復遣使
來賀天寧節是時乾順始建國學設弟子員三百立養
賢務以廩食之崇寧初蔡京秉政使熙河王厚招夏國
卓羅右廂監軍仁多保忠厚云保忠雖有歸意而下無
附者章數上不聽京愈責厚急乃遣弟詣保忠許還爲
夏之邏者所獲京必令金帛招致之三年遼以女嫁乾
順四年乾順遣使巽請皆拒之又令殺其牧放者夏人
遂入鎮戎略數萬口執知鄜州高永年而去又攻湟州

自是兵連者三年大觀元年始遣人脩貢政和四年冬
乾順築臧底河城遂詔河東節度使童貫爲陝西經略
以討之五年春遣熙河經略劉法將步騎十五萬出湟
州秦鳳經略劉仲武將兵五萬出會州貫以中軍駐蘭
州爲兩路聲援法與夏人右廂軍戰於古骨龍大敗之
斬首三千級貫奏凱皆遷秩秋仲武王厚復合涇原鄜
延環慶秦鳳之師攻夏臧底河城敗績死者十四五秦
鳳第三將全軍萬人皆沒厚懼賂貫而匿之六年春劉
法劉仲武合熙秦之師十萬攻夏仁多泉城受其降而
屠之种師道以十萬衆復攻臧底河城克之十一月夏

人大舉攻涇原靖夏城城陷復屠之而去宣和元年童貫復逼劉法使取朔方法不得已引兵二萬出至統安城遇夏國主弟察哥郎君大戰法敗走墜崖折足爲一卒斬首而去是役死者十萬貫隱其敗而以捷聞夏人遂乘勝圍震武劉仲武何瓘等赴之俄解去震武在山峽中熙秦兩路不能餉自築三歲間知軍李明孟清皆爲夏人所殺當夏人之圍震武也察哥曰勿破此城留作南朝病塊乃自引去而宣撫司受解圍之賞者數百人諸路所築城砦皆不毛夏所不爭之地而關輔爲之蕭條果如察哥之言其冬夏遣使來賀天寧節時關右

旣困童貫諷夏人因遼進誓表納款遂詔六路罷兵及夏使來投以誓詔不取貫不能屈迫館伴強持還及邊棄之而去貫炎得而上之貫始大沮四年金兵陷遼中京乾順使李良輔將三萬兵救之敗績已而金將韓萬不至陰山以便宜議和許以割地乾順遂上表於金請以事遼之禮稱藩自是乾順遣使賀金正旦及生辰歲以爲常欽宗立遣使來賀正旦靖康初夏人陷震威城兵馬監押朱昭死之先是金滅遼割天德等四軍及武州河東八館之地與夏人約攻麟州以牽河東之勢及是金兀室陽爲出獵掩至天德逼逐夏人悉奪有其地

夏人請和金人執其使建炎元年九月金帥兀朮與夏約侵宋十月金爲夏國請熙寧以來侵地蓋欲償其所奪也二年朝廷遣主客員外郎謝亮等持詔書賜乾順乾順見使者禮甚倨留居幾月始與約和罷兵亮歸而夏兵已躡其後襲取定邊軍時方有金難夏人謀知關陝無備遂檄延安府言金割鄜延須當理索敢違拒者發兵誅討之帥臣王庶檄報數其乘難貪利之過且曰節制之師尚堪一戰果能辦此何用多言因遣諜間其用事臣李遇夏人竟不出三年知樞密院事張浚使川陝謀北伐欲通夏國爲援卽開封尹宗澤之謀也浚請

國書從之浚旣西行復遣謝亮再使夏國明年亮往迄不得其要領而還紹興元年詔以夏本敵國毋復班曆日其冬川陝宣撫副使吳玠始遣人通夏國書四年冬玠奏夏國數通書有不忘本朝意九年夏人陷府州靈芝生於後堂高守忠家乾順作靈芝歌是年乾順卒年五十七改元曰天儀治平曰天祐民安曰永安曰貞觀曰雍寧曰元德曰正德曰大德凡五十四年子仁孝立諡曰聖文皇帝廟號崇宗

仁孝母曹氏金人用命加開府儀同三司上柱國自是宋廢用命夏人亦不復通使是年高宗詔還夏國之俘

百九十八人明年詔胡世將與夏人議入貢夏人不報又
明年六月夏樞密使慕洧弟慕濬謀反伏誅仁孝上尊
號曰制義去邪仁孝建學校于國中立小學于禁中親
爲訓導尊孔子爲文宣帝自仁孝之立其臣屢作難任
得敬抗禦有功遂相夏國二十餘年陰蓄異志誣殺宗
親大臣其勢漸逼仁孝不能制乃乾道五年仁孝分西
南路及靈州囉龐嶺地與得敬自爲國且爲請封于金
金主不許得敬竟坐誅得敬嘗遣間使于宋以求助宋
以蠟丸書答之爲仁孝所獲云紹熙四年九月仁孝卒
年七十改元曰大慶曰人慶曰天盛曰乾祐凡五十五

年子純祐立諡曰聖德皇帝廟號仁宗

純祐母羅氏立之明年改元天慶凡十四年開禧二年
正月鎮夷郡王安全廢之而自立純祐被廢閏月卒年
三十諡曰昭簡皇帝廟號桓宗

安全乾順之孫仁孝弟仁友之子其廢主自立也金人
以羅氏表請乃冊封安全爲夏國王凡六年卒年四十
二改元曰應天曰皇建宗室遵頊立諡曰敬穆皇帝廟
號襄宗

遵頊始以進士及第爲大都督府主金人冊爲夏國王
夏自乾順稱藩於金八十餘年無干戈之警及是遵頊

爲蒙古所攻金援不至銜之又乘金有蒙古之難侵掠金境嘉定五年遣二僧齎蠟書來宋西邊欲與共圖金人復侵地制置使黃誼不報其後金人南遷議徙都長安遣元帥赤盞以重兵宿鞏州夏畏其侵迫屢議夾攻秦鞏安撫安丙許之以奏劄聞諸朝不待報可命將大舉卒無功十年蒙古率兵圍夏興州遵頊奔西涼十六年遵頊自號上皇傳位於子德旺數年遵頊卒年六十四改元曰光定凡十三年諡曰英文皇帝廟號神宗德旺立念累年構難於金兩國俱弊乃矯前失與金議和自稱兄弟之國寶慶二年蒙古入夏城邑多降德旺

以憂卒年四十六改元曰乾定廟號獻宗於是宗室南平王覲立二年爲蒙古所取歷世凡二百五十八年而亡

夏之境土方二萬餘里其設官之制多與宋同朝賀之儀雜用唐宋而樂之器與曲則唐也河之內外州郡凡二十有二河南之州九曰靈曰洪曰宥曰銀曰夏曰石曰監曰南威曰會河西之州九曰興曰定曰懷曰永曰涼曰甘曰肅曰瓜曰沙熙秦河外之州四曰西寧曰樂曰廓曰積石其地饒五穀尤宜稻麥甘涼之間則以諸河爲漑興靈則有古渠曰唐梁曰漢源皆支引黃河故

灌漑之利歲無旱澇之虞其民一家號一帳男年登十五爲丁率二丁取正軍得漢人勇者爲前軍號撞令郎若脆怯無他伎者遷河外耕作或以守肅州有左右廂十二監軍司諸軍兵總計五十餘萬遇戰則先出鐵騎突陣陣亂則衝擊之步兵挾騎以進其人能寒暑饑渴出戰率用隻日避晦日齋糧不過一旬不恥奔遁敗三日輒復至其處捉人馬射之號曰殺鬼招魂篤信機鬼尚詛祝每出兵則先卜卜有四一以艾灼羊脾骨以求兆名炙勃焦二擗竹于地若撲著以求數謂之擗算三夜以羊焚香祝之又焚穀火布靜處晨屠羊視其腸胃通則兵無阻心有血則不利四以矢擊弓弦審其聲知敵至之期與兵交之勝負及六畜之畜祥五穀之凶稔俗皆土屋惟有命者得以瓦覆之

論曰夏之先世有功於唐至宋興克繼前業爲西土藩輔逆亂之萌實自繼遷德明效尤追隆僭擬及元昊遂顯然稱帝子孫襲以爲常其間雖嘗遜章結好要非由衷宋之封冊班曆祇虛文耳彼其桀驁之性撫之懷之猶不免侵軼况窮兵以逞是徼亂也神宗徼宗惑於邪議空儲蓄魚肉生靈爭無用之地宗社蒙殃有所從來矣蔡邕有言邊陲之患手足之疥搔中國之困胸背之

癘疽三折肱於醫國者尚其鑒諸

宋史新編卷一百九十七



程